

Lita Ipu_{ru} Tju_takutu Iyantja
Hebrews
Nyangatja Ngan_{many}tju Nyakula
 Wangkanytjaku

Put_ula kulini nganalu walkatjunu tjukurpa nyangatja, panya ini kuranyu ngar_anytja wiya Paulaku lita tju_ta pu_runypa. Palu nintipuka tju_tangku kulilpai tjingur_u Paanapatjalu walkatjunu, munta tjingur_u Apalatjalu, munta tjingur_u Tjaalatjalu walkatjunu.

Panya Jesunya mal_aku ilkar_ikutu ankunyangka palumpa nintintja tju_tangku Tjukurpa Palya Jesuku para-tjakultjunangi an_angu Israelkunu Jew tju_tangka. Kaya tjara mulamularingu Jesuku munuya palumpa walytjaringu. Kaya palunya tjananya wangkapai alatji, Jesuku walytja Ipu_ru tju_ta, panya tjanampa wangka Ipu_ru. Kaya Jew kutjupa tju_tangku mulamularingkunytja wiyangku wantingi panya palur_u tjana Moseku tjukurpa kutju pul_kara kulilpai Jesunya wantira.

Munuya palur_u tjana Jesuku walytja Ipu_ru tju_ta pul_kara kuraningi Jesunya wan_annyangka, munuya pul_kara mukumukuningi tjananya mal_aku pitjanytjaku tjanalakutu. Kaya Ipu_ru kutjupa tju_tangku tjingur_u kuliningi tjanala munuya nguwanpa mal_aku anangi ara panya ngan_amanyitjanga pir_uku nyinanytjikitja.

Ka pala palulangu_ru tjukurpa nyangatja wati kutjupangku kulir_a walkatjunu tjanampa tjananya kun_apuntjikitjangku Jesunya wantinytja wiyangku tungun-tunguntu wan_anantjaku. Palur_u alatji tjanala wangkangi lita nyangangka,

“Ara nganmanyitja panya Godalu Mosenya ungunytja, nyara paluru unytju ngarangi munu puṭu anangu tjuṭa palyaningi tjana Godala mirangka tjukaruru ngaranytjaku. Palu Jesunya pitjangu munu puṇu katakutjarangka ilura palumpa milkali tjutira ara kutjupa palyanu kuwaritja, ara panya nganmanyitjangka waintarinytja alatjitu. Ka ara nyanga palunya wanannyangka kutju Godalu nganannya palyalku palula mirangka tjukaruru ngaranytjaku, nganaṇa Jesuku mulamularingkunyangka.”

Ka lita nyangangka ngaranyi tjukurpa nganaṇa kululintjaku panya Jesunya pulka mulapa uwankarangka waintarinytja, ka iwara panya paluru alantja nganaṇa Godala wirkankunytjaku wiru mulapa ngaranyi iwara kutjupa tjuṭangka waintarinytja.

Tjukurpa nyangampa ngarinyi:

- 1:1—2:18 Angelpa tjuṭa palya, palu Godaku katja pulka mulapa tjanala waintara.
- 3:1—4:13 Mosenya palya, palu Godaku katja pulka mulapa palula waintara.
- 4:14—7:28 Jesunya tjukurtjara pulka nganampa nyinanyi kutjupa tjuṭangka waintara alatjitu.
- 8:1—9:22 Godalu Jesulawanungku kalkuntja pulka mulapa ngaranyi Moselawanungku kalkuntja purunypa wiya.
- 9:23—10:18 Christanya nganampa ngalkilpa ilura milkali tjutinyangka kutju Godalu nganannya kura tjuṭa palyantjitjanguṛu kalypangku wantipai
- 10:19-39 Palulanguṛula uti raparingkula Godala ilaringkula palula titutjara tjungu nyinama
- 11:1-40 Nganmanyitja tjuṭanguṛu nganannya nintintja Godaku rawa mulamularingkunytjaku wantinytja

wiya alatjitu

12:1-13 Godanya nganampa mama nyinanyi munu nganannya tjukarurulpai.

12:14-29 Godanya kulira wantinytjaku-tawara

13:1-8 Anangu kutjupa tjuta mukulyangku wirura kanyintjaku

13:9-19 Tjukurpa kurakura tjuta ngunti wangkara nintinyangka kulira wantinytjaku

13:20-25 Tjukurpa malatja

Godalu Nganana Wangkangu Palumpa
Katjawanungku

¹ Uwa, nganmanytju Godalu wangkatjara tjutawanungku wangkangi tjamula tjanala. Paluru tjuta-arangku wangkangi wangkatjara kutjupa kutjupangka, tjukurpa kutjupa kutjupa tjuta. ² Palu kuwari nyanga tjintu malatja ilaringkunyangka Godalu nganana wangkangu palumpa katjawanungku. Panya palumpa katja kuwaripatjara mulapa nyinangi palula tjungu munu pula tjungungku uwankara palunu ilkari, manta kulu. Ka katja palunya Godalu wankara tjunu uwankara mulapa mayatjangku kanyintjaku. ³ Godanya panya wiru mulapa nyinanyi pitalytji pulkanya, ka paluru pitalytji nyanga palunya nganana nintini panya paluru Mama purunypa alatjitu nyinanyi, wiru mulapa. Munu paluru manta ilkari uwankara tjukarurungku kanyini witulya pulkangku. Munu paluru nganampa ngalkilpa ilungu Godalu nganana kura tjuta palyantjitjangu kalypangku pungguwiyangku wantinytjaku. Munu panya palula malangka paluru ilkarikutu ankula Godala witulya pulkangka tjunguringkula mayatja pulkatu nyinanyi.

⁴ Uwa, paluru angelpa tjuta purunypa wiya. Panya Godalu palunya angelpa tjutangka waintara tjunu

puꞑka mulapa. Munu angelpa tjuꞑa puꞑkanmankunytja wiyangku palunya kutju katjanmankula tjunu mayatja puꞑka. ⁵ Panya nyiringka iriti walkatjunkunytja ngaranyi Godalu wangkanytja nyanga alatji,

“Nyuntun ngayuku katja, kana nyanganguꞑu nyuntunya titutjarangku katjanmankuku.” *

Ka nyangatja wanyu Godalu angelta wangkangu? Wiya, Godalu angelta nyanga alatji wangkanytja wiya. Palu paluꞑunku palumpa katja kutju tjakultjunangi Jesunya. Godalu Davidala iriti wangkangi nyanga alatji,

“Palatja ngayuku katja, ka ngayulu palumpa Mama.” *

Ka nyangatja wanyu Godalu angelpa tjakultjunangi Davidala? Wiya, paluꞑu angelpa wangkanytja wiya, paluꞑunku palumpa katja wangkangi.

⁶ Panya palumpa katja kutjukuꞑutja mantakutu iyan-tjikitjangku kulira Godalu wangkangu alatji,

“Angelpa uwankarangkuya kulinma munuya nyanga palunya walꞑunma.” *

⁷ Palu nyaa wanyu Godalu angelpa tjuꞑa wangkangi? Wiya, iriti panya paluꞑu wangkanytja nyiringka ngaranyi tjukurpa nyanga angelpatjara alatji,

“Panya Godalu angelpa tjuꞑa witulpai kutjupa kutjuparira palumpa warꞑarinytjaku,

panya walꞑa puꞑrunyarira munu waru tili puꞑrunyarira.” *

⁸ Palu tjukurpa kutjupa ngaranyi Godalu palumpa katja wangkanytja nyanga alatji,

“Nyuntun mayatja puꞑka mulapa munun nyuntumpa anꞑangu tjuꞑa titutjarangku kanyilku wiyaringkunytja wiyangku.

* 1:5 Psalm 2:7 * 1:5 2 Samuelku 7:14 * 1:6 Psalm 97:7 * 1:7 Psalm 104:4

Nyuntu tjananya tjukarurungku kanyilku kurara
kanyintja wiyangku.

⁹ Munu tjana tjukarurungku palyannyangka kutju nyuntu
pukularipai palu kura palyannyangka nyuntu
putu pukularipai.

Ka panya nyara palulanguru nyuntu tjukarurungku
kulinnyangka Godalu nyuntunya nganmanytju
mayatja pulka mulapa tjunu panya nyuntumpa
malpa tjutangka waintarinytjaku,
kan pulkara pukularinyi.” *

¹⁰ Ka tjukurpa kutjupa ngaranyitu nyanga alatji Godalu
wangkanytja,

“Mayatja, nyuntun kuwaripatjara mulapa uwankara
wiyangka manta ilkari palunu,

¹¹⁻¹² Ka panya ngula manta ilkari wiyaringkuku, palu
nyuntu wiyaringkunytja wiya titutjara alatjitu ny-
inaku.

Wanyu kulila panya mantara angangitja angangungku
rawangku kanyinnyangka katakatipai ka araltjara
wanipai munu kuwaritjangka tjarpapai.

Palu purunypa manta ilkari ngula wiyaringkun-
yangka nyuntu ilkari kuwaritja manta kuwaritja
tjungkuku.

Palu nyuntu kampa kutjuparinytja wiya panya palurutu
alatjitu rawa nyinaku wiyaringkunytja wiya.” *

Alatji nyiringka iriti walkatjungkunytja ngaranyi Godalu
tjukurpa Jesunyatjara wangkanytja. ¹³⁻¹⁴ Uwa, mulapa
Godalu angelta wangkanytja wiya mayatjarinytjaku, palu
palumpa katjangka kutju wangkangu nyanga alatji,
“Pitja munu ngayula tjunguringkula mayatjari,
kana nyuntumpa mirpantju tjuta tjarulku,

* ^{1:9} Psalm 45:6-7 * ^{1:11-12} Psalm 102:25-27

ka nyuntu tjanala waintarira mayatja pulka mulapa nyinaku.” *

Uwa, nyangatja Godalu palumpa katjangka wangkangu. Ka angelpa tjuꞑa wanyu nyaa? Wiya, tjana kurunpa tjuꞑa nyinanyi munuya Godanya kulira walꞑulpai, ka panya tjananya Godalu wituꞑa iyalpai anꞑangu palumpa walytja tjuꞑa atunymankunytjaku. Panya anꞑangu palunya tjananya Godalu ngula wankarꞑunkuku.

2

Tjukurpa Nganampa Wankakutu Mulapa

¹ Uwa, Jesunya pulka mulapa angelpa tjuꞑangka waintara, kala uti Jesuku tjukurpa nganaꞑa ngaꞑmanytju kulintjatjanungku purkarꞑangku kulinma watarkurinytja wiyangku. Panya nganaꞑa tjukurpa nyanga palumpa watarkurirampa Jesulanguꞑu paꞑuringkuku. ² Panya iriti puli panya ini Tjaniyala angelpa tjuꞑangku Mosenya ungu Godaku tjukurpa. Ka tjukurpa nyara paluꞑu panya tjukaꞑuru mulapa, panya anꞑangungku tungunpungkula tjukurpa palunya kulira wantinyangka palumpa kura ngapartji utiringu.

³ Ka tjukurpa nyanga pulka Jesuku nganaꞑa kulira wantinyangka nganampa kura pulka palu puꞑunypaꞑu ngaraku, panya tjukurpa nyanga paluꞑu pulka mulapa kulira mulamularingkula wankaringkunytjaku. Palu nganaꞑa kulira wantirampa puꞑu wankaringanyi. Panya tjukurpa wanka nyanga palunya Mayatja Jesuluwararꞑangku tjanala tjakultjunu, ka tjana ngapartji kulintjatjanungku nganaꞑala utingku ngalya-tjakultjunu kulira mulamularingkunytjaku. ⁴ Ka tjana tjukurpa nyanga palunya nganaꞑala wangkanyangka Godalu

* 1:13-14 Psalm 110:1

miracle kutjupa kutjupa tjuta nintipukangu palyaningi witulya pulkangu, nganana nyakula tjukurpa nyanga palumpa mulamularingkunytjaku. Munu Godalu Kurunpa Milminga ngananaala unngu tjarpatjunu, ka nganananya witulyananyi Kurunpa Milmitu kutjupa kutjupa tjuta witulya pulkangu palyantjaku paluru nintinnyangka. Kala nyanga alatji witulyatjararingkula tjukurpa panya palumpa pulkaratu mulamularinganyi. Kala wanyu tjukurpa pulka nyanga palunya kulira wantima? Wiya, utilanku kulira wantinytja wiyangu wantima wankakitjangu.

*Jesunya An*angurira Nganananya Purunyaring

⁵ Ka panya Godalu angelpa tjuta tjunkunytja wiyatu mayatjarira uwankara kanyintjaku ngula manta ilkari kuwaritja utiringkunyangka. ⁶ Palu Godalu anangu tjuta tjunu mayatjarira kanyintjaku, panya nyiringka iriti walkatjunkunytja alatji ngaranyi wati kutjupangu wangkanytja,

“God, nyuntu panyan pulka mulapa, ka panya anangu tjuta minga purunypa.

Palu nyuntu tjananya ngaltunytjungku kulilpai,
Munun tjananya atunymara kanyilpai.

⁷ Panya nyuntu anangu palyanu pulka mulapa nyinanytjaku angelpa tjutangka itingka, pitalytji pulkatjara.

⁸ Munu panyan nyuntu anangu tjunu mayatjarira nyuntu panya paluntja uwankara kanyintjaku.” *

Panya alatji ngaranyi iriti walkatjunkunytja, kala nyanga palulanguru kulini mulapa Godalu anangu tjunu uwankara mulapa atunymara kanyintjaku.

* 2:8 Psalm 8:4-6

Palu kuwarila putu nyanganyi anangu kutjupangu uwankara tjukarurungku kanyinnyangka. Wiya alatjtu.
 9 Palu nganana Jesunya kutju nyanganyi. Paluru kutju mayatja pulka nyinara uwankara kanyini. Nyara palunya panya Godalu angelpa tjutanguru unytjungku tjarunu pula tjungu nyinanytjatjanungku paluru anangurira ngalkilpa ilunytjaku anangu uwankaraku. Godalu panya mukulya pulkangku iyanu anangu tjuta ngalkintjaku, ka panya paluru pikatjararingkula anga-ilungu nganana kura tjuta palyantjitjanguru. Nyara palulanguru paluru ilunytjitjanguru Godalu palunya pulka mulapa tjunu uwankarangku palunya walkuntjaku.

10 Nyangatja Godalu tjukarurungku palyanu nganananya palumpa tjitji tjuta wankaru malakungku wirkakatinytjikitjangku. Panya paluru kutjungku uwankara paluntjatjanungku wirura kanyilpaingku kulira Jesunya iyanu anangu tjutaku iwarankunytjaku Godalakutu, tjana palumpa walytjaringkula wirkankunytjaku palumpa pitalytjingka. Panya Jesunya iyanu pikatjararingkula ilunytjaku, ka nyara palulanguru kutju paluru nganananya wankaru wirkakatinyi Godalakutu. 11 Panya Jesunya nganana walytjarrara walytjarrara Mama kutjutjara nyinanyi palumpa walytja kutjupa tjuta kulukulu. Nyara paluru nganananya wankarunu kura nganampa paltjira wiyara, munulanya palulangurulta kunta wiyangku pukultu malanypanmananyi. 12 Panya Jesulu iriti Mama Godala wangkangku nyanga alatji,
 “Ngayuluna ngayuku malanypa tjutangka nyuntunya tjakultjunkuku.
 Mununa tjana tjunguringkunyangka tjanala ngururur
 ngururpa ngarala nyuntunya inkara walkulku.” *

* 2:12 Psalm 22:22

¹³ Munu alatji piruku wangkangu,

“Ngayuluna mulamularingkuku Godaku.” *

Munu nyangatja kulu wangkangu alatji,

“Nyanga ngaranya Godaku tjitji tjutangka tjungu,

panya paluruni witunu tjananya atunytju kanyint-
jaku.” *

¹⁴ Godaku tjitji tjuta panya anangu nyinanyi
iltjanpa milkalitjara. Palulanguru Jesunya

nganananya purunypatu ananguringu munu iltjanpatu
milkalitjararingu. Alatji paluru ananguringu nganampa
anga-ilura mamu Satangga wiyantjikitja, panya paluru
nganananya ilunytjaku kuralpai. ¹⁵ Uwa, Jesunya

pitjangu nganananya ngalkintjikitja Satantanguru munu
paluru nganananya raparingkunytjaku palyanu. Panya
ngananmanytjula mamungka kulira nganana titutjara
nguluringkupai ilunytjaku-tawara. ¹⁶ Palu Jesunya
angelpa tjuta ngalkintjikitja pitjanytja wiya. Paluru
nganananya wankarunkunytjikitja pitjangu Aipuramaku
tjamupiti malatja malatja.

¹⁷ Nyanga palunyakitja panya paluru mantakutu
pitjala ananguringu munu mantangka nyanga nyinangi
anangu alatjitu nganananya purunypa. Munu panya
Godaku warkarira nganampa tjukurtjara pulka nyinangi
ngaltunytju pulkanya munu paluru tjukarurungku
palyanu nganampa ngalkiltu Godalu nganananya kura
palyantjitjanguru pungkunytjaku-tawara nganana
karalyarira Godalakutu malaku aruringkunytjaku.

¹⁸ Panya mamu tjutangku munu anangu tjutangku
kulu Jesunya kuraringkunytjaku rawangku arkaningi,
palu paluru tungunpungkula alatjitu wantingi. Nyanga
palulanguru paluru nganananya nintini nganana

* 2:13 Aitjayaku 8:17 * 2:13 Aitjayaku 8:18

palu purunypatu kura palyalwiya tungun-tungunpa nyinanytjaku.

3

Jesunya Pulka Mulapa Mosela Munkara

¹⁻² Walytja wiru tjuta, nyangangurula uti Jesunya pulkara kulinma, panya Godalu nganananya altingu palula tjunguringkula nyinanytjaku. Kala uti palunya rawangku kulinma, panya palunya Godalu tjukurtjara pulka ngurkantara iyanu nganampa ngalkilpa pulka nyinanytjaku. Ka paluru wanganarangku Godala kulira palumpa warka palyanu wantinytja wiyangku Moselu purunytju, panya paluru Godala wanganarangku kuliningi Godaku walytjapiti tjukarurungku kanyira.

³ Palu Jesunya Mosela waintara nyinanyi mayatja pulka mulapa, panya Mosenya Godaku walytja tjutaangka tjungu nyinanyi anangu alatjitu, ka Jesunya panya palula tjanala waintara nyinanyi panya paluru anangu tjuta Godaku walytjaringkunyitjaku palyanu. ⁴ Panya anangu watarku nyinara putu Godaku walytjaringanyi, palu Jesulu palyan-nyangka kutju palumpa walytjaringanyi. Uwa, Godalu uwankara mulapa palyanu.

⁵ Ka Mosenya panya Godaku warkaripai nyinangi munu palula wanganarangku kulira warkaringi Godaku walytja tjutaangka. Munu panya tjanala tjakultjunangi alatji, “Ngula Godalu kutjupa kutjupa tjuta wangkara utilku.” ⁶ Ka panya Christanya palu purunypatu Godala wanganarangku kulira warkaripai Godaku walytjapiti atunyitju kanyira. Palu panya paluru Godaku katja, ka Mosenya Godaku katja wiya wati warkaripai kutju anangu tjuta purunypa. Ka panya nganana Godaku walytjapiti nyinanyi. Munula pakuwiyangku Jesunya rawangku wanarampa titutjaralta palumpa walytja nyinaku. Utila

rawa pukulpa ala-ala patara nyinama palumpa, panya palurulanya ngula ngura wirukutu katinyi. Uwa-man̄tu nganāna palumpa walytjapiti titutjara nyinaku nyanga palunya rapangku kulirampa.

Ngura Kalkuntjitjanka Wirara Pakuwiyaringkuny-tjaku

⁷⁻⁸ Kaya nyangatja kulinma Kurunpa Milmilku tjukurpa panya nyiringka iriti walkatjunkuny-tja ngaranyi nyanga alatji,

“Nyura kuwari Godalu wangkanyangka kulira tungun-pungkuny-tja wiyangku wantima.

Panya iriti pilangka nyurampa walytjapitingku Godala tungunpungkula kulintja wiyangku wantingi.

Ka nyura palunya tjananya arkalwiyangku wantima.”

⁹ Godalu panya wangkangu alatji,

“Panya tjana iriti pilangka rawa para-ngarangi kuli 40, kana kutjupa kutjupa wiru tjuṭa tjanampa palyaningi nyakula mulamularingkuny-tjaku.

Palu paluru tjana nyakula mulamularingkuwiyangku wantingi,

munuya ngayunya rawangku wituwituningi piruku palyannyangka nyakuny-tjikitjanku.

¹⁰ Kana palulangu ru tjanampa pulkara mirpanaringi mununa kulinigi alatji, ‘Nyaakuya ngayunya titutjarangku wantira kampa kutjupa kulini munu ngayulu wangkanyangka wanganarangku kulintja wiyangku wantinyi?’

¹¹ Mununa palulangu ru tjanampa mirpanarira mulamulangku tjananya kalkunu nyanga alatji,

‘Paluru tjana ngura panya ngayulu kalkuntjitjanga
wirkankunytja wiya alatjitu ngaraku ngayula
tjungu nyinara pakuwiyaringkunytjikitja.’”*

¹² Walytja wiru tjuṭa, pulkarayanku nyangama
munuyanku atunymanama. Tjinguru kutjupangku
nyuralanguru kuraringkula kutjupangka ngunti kulira
Godalanguru paturingkuku, ka nyuranku palula-tawara
pulkaṛa atunymanama, panya Godanya wanka alatjitu
nyinanyi. ¹³ Uti nyuranku ngapartji-ngapartjingku
wangkara kunpunma kura ngunti kulira tarilarantjaku-
tawara, panya kurangku nganannya ngunti kuralpai
Godala tungunpungkunytjaku. Palu rawangkuyanku
kunpunma tjintu kutjupa tjintu kutjupa ngulaku
patantja wiyanku, panya nyura ngulaku patarampa
tjinguru ngururpaṭu iluku tjukurta kunpuringkunytja
wiyatu. ¹⁴ Uwa, pulkarayanku atunymanama, panya
nganaṇa uwankara Christala tjunguringu munula
titutjarangku tungun-tunguntu palunya wanarampa
nganaṇa rawa palula tjungu nyinaku. Panya nganaṇa
nganmanytju palumpa pulkaṛa mulamularingkula
palunya wananingi, palu purunytjula uti wananna
ilunytjitjakutu-wangkara, munula mulapa palula tjungu
nyinaku.

¹⁵ Panya nyiringka iriti walkatjunkunytja ngaranyi
alatji,

“Nyura kuwari Godalu wangkanyangka kulira tungun-
pungkuwiyanku wantima.

Panya iritiya nyurampa walytjapitingku Godala
tungunpungangi, ka nyura palunya tjananya
arkalwiyanku wantima.”*

* 3:11 Psalm 95:7-11 * 3:15 Psalm 95:7-8

¹⁶ Ka nganalu tjana wanyu panyatja Godala kulintja wiyangku wantira tungunpungangi? Wiya panya paluru tjana, panya Moselu tjananya Itjipalanguru katingu. ¹⁷ Palu nganaku tjanampa Godanya rawa mirpanaringi kuli 40? Wiya panya palumpa tjanampa, panya pilangkaya tungunpungkula kura palyaningi, munu panyaya nyara palula arangka pilangka ilungi. ¹⁸ Godalu panya mirpanarira kalkunu alatji, “Paluru tjana ngura panya ngayulu kalkuntjitjangka wirkankunytja wiyatu ngayula nyinara pakuwiyaringkunytjikitja.” Palu ngananya tjananya wanyu paluru alatji wangkangu? Wiya panya palula tjanalatu, panya palula tungunpungkupai tjutangka. ¹⁹ Kala kulini panya tjana Godaku mulamularingkuwiyangku wantira ngura panya pakuwiyaringkupaingka putu wirkanangi.

4

¹ Palu ngura panya paluru ala alatjitu ngaranyi nganana Godala wirkara nyinara pakuwiyaringkunytjaku. Kala uti purkarangku kulinma, ngunti kulira ngura panya palula ngatalarinytjaku-tawara. ² Panya nganana kulinu Tjukurpa Palya, panya Godalulanya altinyi palula tjunguringkula pakuwiyaringkunytjaku. Ka palu purunytjuya anangu Israelkunu tjutangku iriti kulinu Godalu palula tjanala tjukurpa palu purunypatu wangkanyangka. Palu paluru tjana panyaya kulira wantingu munuya wantinytjatjanu putu wirkanu ngura panya Kainanta, panya tjana Godaku mulamularingkunytja wiyangku wantingi paluru kalkunnyangka. ³ Palu nganana palumpa tjukurpa wirruku tjukaruru mulamularingkula palula tjungu ngaranyi pakuwiyaringkunytjikitja. Panya Godalu kuwaripatjaranguru alatjitu uwankara palura wiyaringkunytjatjanungku rawangkutu altingi

anangu tjuṭa palula tjunguringkula pakuwiyaringkuntjaku. Kaya uti iriti miri panya tjuṭa mulamularingama, palu tjana kulira wantingi. Ka palulangu ru Godalu tjananya painu panya nyiringka alatji ngaranyi Godalu wangkara kalkuntja,

“Ngayuluṅa tjanampa mirpaṅarira mulamulangu tjananya kalkunṅu nyanga alatji,
 ‘Paluru tjana ngura panya ngayulu kalkuntjitjangka wirkankuntja wiya alatjiṭu ngaraku ngayula tjungu nyinara pakuwiyaringkuntjikitja.’” *

⁴ Panya iriti walkatjunkuntja nyiringka ngaranyi nyanga alatji,

“Tjintu 6 uwankara palura wiyara Godanya pakuwiyaringu tjintu panya 7-ta.” *

⁵ Munu piruku Godalu wangkanytja nyiringka ngaranyi nyanga alatji,

“Paluru tjana ngura panya ngayulu kalkuntjitjangka wirkankuntja wiya alatjiṭu ngaraku ngayula tjungu nyinara pakuwiyaringkuntjikitja.” *

⁶ Panya nganmanyitja tjuṭangku Tjukurpa Palya kulira wantingi munuya palulangu ru ngura panya palula wirkankuntja wiya. Palu ngura paluru kuwari ala alatjiṭu ngaranyi kutjupa tjuṭa wirkara pakuwiyaringkuntjaku. ⁷ Nyanga palunyala kulini panya ngula kuli tjuṭa mulapa ngarala wiyaringkunya Godalu panya palunyaṭu piruku kalkunṅu Davidala, ka paluru anangu tjuṭangku kulintjaku walkatjunu nyiringka alatji,

“Nyura kuwari Godalu wangkanyangka kulira tungunpungkuntja wiyangku wanganarangu kulinma.”

* 4:3 Psalm 95:11 * 4:4 Genesis 2:2 * 4:5 Psalm 95:11

*

⁸ Uwa, ngura panya pakuwiyaringkupainya kuwaritu ala ngaranyi, panya Tjatjuwalu tjananya Kainanta wirkakatinyangka Godalu malangka rawangku tu wangkangi, “Tjintu kutjupa ngaranyitu anangu tju ta wirkara pakuwiyaringkuny tjaku panya ngayulu kalkuntjitjangka.” Kala nyanga palulanguru kulini alatji, “Munta-uwa, Tjatjuwalu tjananya Kainanta wirkakatinyangkaya mulamula pakuwiyaringkuny tjawiyatu nyinangi.”*

⁹⁻¹⁰ Munula kulini mulapa ala ngaranyi kuwaripatu nganana Godaku walytja tju ta palula tjungurinkula pakuwiyaringkuny tjaku, panya Godanya purunypa, panya paluru tjintu 7-itja pakuwiyaringu, palu purunypa. Panya Godanya tjintu 6 pulkara war karangi munu war ka wiyaringkula pukulpa alatjitu nyinara pakuwiyaringu. Ka nyara palu purunypa nganana Godalu kalkuntjitjangka wirkara nyinara pakuwiyaringkuku, war ka nganampa palyantjatjanu. ¹¹ Kala palulanguru uti kurunpa wink ingku Godaku iwara tungun-tunguntu ar kara wananma Godalu kalkuntjitjangka wirkara pakuwiyaringkuny tjik itjangku. Panya tjanaya iriti mulamularingkuwiyangu wantingi munuya Godala tungunpungkula paturingu. Kala uti pala palula-tawara tjukaruru mulamularingama munu Godala titutjarangku wanganarangu kulinma.

¹² Panya Godaku tjukurpa wankakutu alatjitu anangungku wangkanytja purunypa wiya, panya Godalu wangkanytja uwankara mulapa alatjitu utiringkupai. Palumpa wangka tjula iri kampa kutjaratjara, pulka mulapa. Panya tjula iri pulkangku anangu wakara

* 4:7 Psalm 95:7-8 * 4:8 Tjatjuwalu panya Moseku arangka mayatarira Israelkunu tju ta katirinangi Mosenya ilunyangka malangka.

tarka unngutja miiltjingalpai munu katara ala lipilpai, palu purunyaju Godaku tjukurtu nganannya unngu kulintja uwankara tjukarurungku miiltjingalpai.¹³ Panya Godanya uwankaraku ninti, ka nganana putu palula kumpini. Paluru uwankara nintingu nyakula kulini nganana unngu kulintja kulu, kala putu kutitjura kanyini. Munu ngula paluru kutjungku nganannya unngu nyakula puntura wangkaku, ka nganana putu palula wiyankaku.

Pala palulanguula uti Godaku iwara tungun-tunguntu wananna paluru kalkuntjitjangka wirkara pakuwiyaringkuntjikitjangku.

Jesunya Tjukurtjara Pulka

¹⁴ Uwa, nganana panya Jesuku mulamularinganyi. Panya paluru nganampa tjukurtjara pulka Godaku katja munu paluru ankula Godala tjungurungkula nganampa ngalkilpa nyinanyi. Kala pala palulanguuru nganana uti palumpa mulamularingkula wantinytja wiyanku palunya tungun-tunguntu wananna.¹⁵ Panya anangu tjujangu mamu tjujangu kulu nganannya rawanku arkalpai kuraringkuntjaku. Palu nganampa ngalkilpa pulkanku nyanganpa nintingu kulini panya nganmanytulpiya mantangka nyinanyangka palu purunyaju palunya mukumukura arkaningi kuraringkuntjaku. Palu paluru kulira wantingi kura palyantja wiyanku. Munu paluru nganampa ngalturinganyi panya nganana putu kulira wantipai kutjupanku mukumukunyangka.¹⁶ Kala uti palulanguuru raparingkula Godala ilaringama ngulurungkuntja wiya. Panya paluru ngaltunyaju mukulya mulapa nganampa nyinanyi munu nganana kura palyantjatjanu piiwiyaringkunyangka nganampa

kalyparingkupai. Kala uti kurantjikitjangku arkannyangka palula tjapinma nganaꞑanya anga-kanyintjaku kuraringkunyjtaku-tawara, kalanya mulapa paluꞑu ngaltꞑunyjtungku anga-kanyilku.

5

¹ Godalu panya wati tjukurtjara pulka aꞑangu tjuꞑanguꞑu ngurkantaꞑa tjunkupai palumpa tjanampa ngalkilpa nyinara warꞑarinyjtaku.* Ka tjukurtjara pulka nyara paluꞑu inmangka kuka pungkula tiliwakaꞑa Godanya ungupai mai kulu, paluꞑu nyakula aꞑangu tjuꞑa kalypangku pungkuwiyangku wantinyjtaku tjana kura palyantjitjanguru. ² Ka aꞑangu tjuꞑangku tjinguru watarkungku kura palyannyangka tjukurtjara paluꞑu ngaltꞑunyjtungku tjananya purkaꞑankupai, panya paluꞑu kulu upa kunꞑu wiya tjana purunypaꞑu. ³ Pala palulanguru tjukurtjara paluꞑu kuka pungkula tiliwakaꞑa Godanya ungupai palumpa kuranguru kulu aꞑangu tjuꞑaku kuranguru kutju wiya, ka Godalu palunya kulu kalypangku wantipai paluꞑu kura palyantjitjanguru aꞑangu kutjupa tjuꞑa purunypa.

⁴ Palu aꞑangu nyara paluꞑunku walytjangku pulkanmankupai wiya tjukurtjara pulka nyinanyjtikitjangku, palu paluꞑu Godalu ngurkantankunyangka kutju tjukurtjararingkupai, Aaronnga purunypa, panya palunya Godalu ngurkantaꞑa tjunu tjukurtjara pulka nyinanyjtaku. ⁵ Ka nyara palu purunytjuꞑu Christalu paluꞑunku walytjangku pulkanmankunyjtaja wiya tjukurtjara pulka nyinanyjtikitjangku. Palu Godalu palunya ngurkantaꞑa tjunu alatji wangkara,

* 5:1 Panya Aarontanguruꞑa wati tjukurtjara pulka tjuꞑa nyinakatingi wanapari wanapari Godalu wati tjuꞑanguꞑu ngurkantaꞑa tjunkunyjtaja.

“Nyuntun ngayuku katja, kana nyanganguru nyuntunya
titutjarangu katjanmankuku.” *

Wangka nyangatja nyiringka walkatjunkunytja ngaranyi.

⁶ Ka nyiri palulatu tjukurpa kutjupa ngaranyi Godalu
wangkanytja nyanga alatji,

“Nyuntun tjukurtjara pulka titutjara nyinaku milmilpa
mulapa, wati Milkitja-tikanya purunypa,
panya paluru tjukurtjara pulka mulapa iriti nyi-
nangi, palu purunypa.”* *

⁷ Ka Godalu panya Jesunya ilunytjaku-tawara
wankarunkunytjaku ngarangi alatjitu. Ka panya Jesulu
mantangka nyinaralpi Godala pulkara mirara tjapira
ulangi palunya rapantjaku ngulu wiya ilunytjikitjangku.
Palu paluru Godala titutjarangu wanganarangku
kuliningsi palurunku pulkanmankunytja wiyangu, ka
nyara palulangu Godalu palunya ngapartji kulinu
paluru ulara tjapinnyangka, munu palunya rapanu
ngulu wiya ilunytjaku. ⁸ Ka nyura tjinguru kulini
palunya pikantankunytja wiya nyinanytjaku-palku.
Palu palunyaya pungu alatjitu, ka pikatjararingkula
ilungu. Panya paluru Godala wanganarangku kuliningsi
ka pika palumpa wirkanu. Munu paluru nintiringkula
kulinu panya anangungku Godala wanganarangku
kulinnyangka pika palumpa utiringkupai. ⁹ Panya Godalu
Jesunya witanu ankula mantangka kutjupa kutjupa tjuta
palyantjaku. Ka paluru wanganarangku kulira palyanu
munu panya ilungu, ka nyara palulangu anangu
tjuta kuwari wankaringkunytjaku tjanampa ngaranyi
alatji, tjana palula wanganarangku kulirampa. Nyara
palulangu ruya anangu tjuta Godala tjungu titutjara

* 5:5 Psalm 2:7 * 5:6 Tjukurpa Milkitja-tikanya-tjara ngaranyi nyiri
ini Genesis-ala 14:17-20. * 5:6 Psalm 110:4

nyinaku. ¹⁰ Palu Godalu Jesunya tjunu tjukurtjara pulka mulapa titutjara nyinanytjaku, panya wati Milkitjatikanya tjukurtjara pulka nyinangi, palu purunypa.

¹¹ Tjinguruna piruku nyurala tjakultjunama tjukurpa nyangatja panya Jesunya Christanya Milkitjatikanya purunypa nyinanytja. Palu putuna nyurala utingku wangkanyi panya nyura tjukurpa pulka putu nguwanpa kulilpai. ¹² Nyura nganmanypa Godaku walytjaringu munu kuwari nyura tjinguru palumpa tjukurku ninti pulka nyinama munu nyura tjinguru anangu kutjupa tjuta ngapartji nintinma kuwari kutju Jesuku walytjaringkunyitja tjuta. Palu wiya, nyura nintiringkunyitja wiyatu nyinangi munu nyura tjukurpa nganmanyitjaku watarkuringu, ka nyuranya nganana piruku nintintjaku ngaranyi, nyura iti purunytju kuwaripangu ipi tjikinnyangka. Panya iti tjutangu mai kuka putu ngalkupai munuya paluru tjana ipi kutju tjikilpai, palu purunypa nyura tjukurpa pulka tjuta putu kulilpai, munu nyura tjukurpa panya nganmanyitja utitja tjuta kutju titutjarangu kulilpai. ¹³ Panya iti tjutangu putu ngurkantankupai tjukarurungku palyantjikitjangku. Ka nyura nyara palu purunytjutu putu ngurkantankupai tjukarurungku palyantjikitjangku. ¹⁴ Palu uti nyura anangu pulka tjutampa tjukurpa pulka tjutaku nintiringama. Munu nyura nyara palulanguru nintingku kulilku palya tjukaruru nyinanytjikitjangku munu kura kulu wantinytjikitjangku.

6

¹⁻² Palu nyaaku nyura tjukurpa nganmanyitja tjuta Christanyatjara rawangu wangkara kulintjikitja mukuringanyi? Wanyuya tjukurpa nganmanyitja tjutaku nintiringkunyitjatjanungku waintara kulinma

tjukurpa kutjupa tjutaku nintiringkuny^tjikitjangku. Panya anangu tjuta Jesuku walytjaringkunyangka nganana palula tjanala nganmany^tju nintilpai iwara kurangka ankunytjatjanu kampa kutjuparinytjaku ilunytjaku-tawara, munu Godaku mulamularingkula palumpa iwarangka ankunytjaku. Munula tjanala nintilpai minangka baptise-katinytja, munu katangka mara tjunkunytja kulu panya Godalu witulyankunytjaku. Munula tjanala nintilpai panya ngula Godalu nganananya ilunyangka wankara pakaltjingantja, munu paluru anangu uwankara ngurkantara tjarantja, munu kura tjuta paira iyantja ngura kurakutu titutjara nyinanytjaku. Alatji-alatjila tjanala nintilpai kuwari kutju Jesuku walytjaringkuny^ttja tjuta. Ka nyura nyaaku tjukurpa nyanga palumpa tjanampatu piruku nintiringkuny^tjikitja mukuringanyi? Uti nyura Godanya wanarampa tjukurpa kutjupa tjutaku kulu rawatu nintiringkukatima munkaritja tjutaku kulu. ³ Uwa, wanyula tjukurpa kutjupa tjutaku kulu rawa nintiringama Godalu nintintjikitja mukuringkunyangka.

⁴⁻⁶ Kulilaya! Tjinguru anangu kutjupa Jesuku walytjaringanyi. Ka panya Godalu palula utini palumpa tjukurpa, ka kulilpairinganyi munu palula tjunguringkula kurunpa pukularinyi panya palunya wankarunu Godalu. Ka panya Kurunpa Milmilnga palula pitjala unngu tjarpara nyinakatinyi. Ka paluru unngu kulini panya Godalu kalkuntjitja mulapa tjukaruru ngaranyi. Munu kulini, "Mulapa Kurunpa Milmilnga witulya pulkanya ngayula unngu warkarinyi." Palu tjinguru paluru nyanganpa uwankara kulintjatjanungku Jesunya wantiku munu ala kutjupangka ankuku, kala yaaltjingara palunya Godalakutu malakungku katiku kampa kutjuparira palunya wanantjaku? Wiya alatjitu,

panya paluꞑu ngaꞑmanypa Jesuku mulamularingu munu palulanguru ngulalta palunya ngunti kuraꞑa wantingu. Ka nyangatja panya Jesunya piꞑuku punu katakutjarangka utitjunkunytja puꞑunypa. Panya anꞑangu tjuꞑangku Godaku katja wantira mirara wangkangi punu katakutjarangka utitjunkunytjaku, palu puꞑunypa paluꞑu palyaꞑi Jesunya wantikatira, kaya anꞑangu tjuꞑangku palunya nyakula Jesunya anaꞑi.

7-8 Tjukurpa nyangatjaya kulila! Wati kaanangka warꞑaripaingku unꞑinypa tjunkupai mantangka mai pakaltjingantjikitjangu. Ka minangku puyiꞑa manta tulykulpai ka mai puꞑka pakalpai. Ka Godalu manta nyara palunya nyakula palyanmankupai. Ka manta nyanga paluꞑu anꞑangu kulilpai tjuꞑa puꞑunypa. Palu manta kutjupa kulu ngaranyi, ka nyara palunya kulu minangku puyilpai palu kutjupa kutjupa tjuꞑa pakalpai manta nyara palula tjilka, ukiri kurakura tjuꞑa kulukulu. Ka manta nyanga palunya tjinguru Godalu nyakula kuranmankuku. Ka ngula warungku kampara wiyalku manta nyanga palunya. Palu manta nyanga paluꞑu anꞑangu kulira wantipai tjuꞑa puꞑunypa, panya ngaꞑmanypaya Jesuku mulamularingu munuya malangka palunya wantikatira kurangka anu.

9 Palu nyanganpaꝼa nyurala ngaꝼmanytju tjakultjunanyi nyura Godanya wantinytjaku-tawara. Ka walytja wiꝼru tjuꝼa, ngayulu nyuranya kulini panya nyura iwara palyangka kutju ananyi wantinytja wiya. 10 Ka panya Godanya palya mulapa tjukaꝼuru ngaranyi, munu nyuranya nyanganyi palumpa wiꝼura warꝼarinyangka munu paluꝼu nyurampa pukularinyi. Paluꝼu nyanganyi nyuranya palumpa mukuringkunyangka, panya nyura palumpa walytja tjuꝼaku mukuringkupai munu tjananya alpamilalpai. Munu nyura kuwari nyanga alatjitu

nyinanyi. ¹¹⁻¹² Palu ngayulu mukuringanyi nyura uwankarangku rapangku war̄ka wiru palyalkatinytjaku kurunpa winkingku ilunytjakutu-wangkara. Panya Godalu nyuranya wirura kalkunu, ka nyura pukulpa patani palumpa pakuringkunyitja wiya. Nyara palulanguru nyura uti rapangku titutjarangku Jesunya wan̄anma munu nyura wiru mulapa mantjilku Godalanguru. Uwa, ngan̄manyitja tjuta purunytjuya wan̄anma pakuringkuwiyangku, panya tjana iriti Godaku titutjara mulamularingangi pakuringkunyitja wiya munuya nyara palulangurulta kuwari mantjini kalkuntja panya palunya.

¹³⁻¹⁴ Panya iriti mulapa Godalu Aipuramanya kalkunu alatji wangkara, “Ngayulu nyuntunya kalkuni pukulmankunytjikitjangku. Ka nyuntulanguru malatja malatja ma-tjutaringkuku.” Munu paluru Aipuramanya palumpa mulamularingkunytjaku ini palurunku wangkara kalkunu. Tjingu ru ini kutjupa pulka mulapa ngaranyangkampa paluru ini palunya wangkara kalkunma. Palu wiya, ini kutjupa pulka mulapa palula waintara ngaranyitja wiya alatjitu. Ka nyara palulanguru Godalu palurunku ini wangkara kalkunu. ¹⁵ Ka Aipuramanya rawa alatjitu Godaku mulamularingangi ngururpa watarkurinytja wiya alatjitu. Ka Godalu palunya mulapatu ungu panya paluru kalkuntjatjanungku. ¹⁶ Kaya panyatja kulinma, panya kutjupangku kalkunnyangka an̄angu kutjupa tjingu ru putu mulamularingkupai, ka an̄angu nyara paluru mulamularingkunytjaku wati pulkaku ini wangkapai, ka an̄angu pulka ini wangkanyangka kulira mulamularingkupai. ¹⁷ Ka palu purunypatu Godalu tjananya ini pulka mulapa wangkara kalkunu ini palurunku tjana palumpa mulamularingkunytjaku.

Panya paluru mukuringangi tjana nintingu kulintjaku paluru panya kalkuntja kutjuparinytja wiya ngaranytjaku. Munu palurunku ini wangkangu kalkuntjatjanungku tjana mulapa kulintjaku.

¹⁸ Uwa, panya Godalu mulapa tjukarurungku kalkulpai ngunti wangkanytja wiyangu, munu paluru kalkura palurunku ini wangkanytjatjanungku kampa kutjuparinytja wiyangu ungupai. Kala nyanga palulanguru nganana pulkara raparingkula pukultu ala-alangu patani paluru nganananya kalkuntjatjanungku ungunytjaku, panya nganana Godala tjunguringu palula wankaru nyinanytjikitja. ¹⁹⁻²⁰ Palu nganana panya Godalu kalkuntja titutjarangu kulira mulamularingkula kutju kunpu tungun-tungunpa nyinaku Jesuku patara. Panya paluru Mamaku ngurakutu nganmanypa anu ilkarikutu nganampa ngalkilpa ilunytjatjanu. Panya wati tjukurtjara pulka tiinta milmita tjarpara waintara matjarpapai ngura milmilpa mulata, nyara palu purunypa Jesunya waintara tjarpangu ngura panya ilkaritjangka munu nganampa alanu ngalkilarinytjatjanungku, nganana ngapartji malawanu tjarpara nyinanytjaku palula tjungu. Panya paluru tjukurtjara pulkaringkula titutjara nyinanyi wati panya Milkitja-tikanya purunypa.

7

Tjukurtjara Milkitja-tikanya

¹⁻³ Panya Milkitja-tikanya ngura ini Salemaku mayatja nyinangi munu paluru wati tjukurtjara pulka nyinangi God Katutjaku. Ka ini panya Milkitja-tikanya tjaa Iipuru ngaranyi munu ini paluru wangkanyi alatji, Iwara tjukaruruku mayatja. Ka ngura ini Salemanya wangkanyi alatji, *Kalya nyinanytjanya*. Kala palulanguru Milkitja-tikanya kulilpai nyanga alatji, "Paluru-mantu

mayatja pulka angu tjuta kalya nyinanytjaku palyalpai.” Palu ngananya wanyu palumpa mama ngunytju, tjamu kami kulu? Ngurpala nyara palumpa. Palu wanyu ngura yaaltjingka iti paluru wirkanu? Munu ngura yaaltjingka paluru ilungu? Nganana ngurpa. Panya tjanaya nganmanytju nyiringka walkatjunkunytja wiyatu. Palu nganana kulini panya paluru wati tjukurtjara pulka titutjara nyinapai, Godaku katja purunypa.

Panya nganana ninti Milkitja-tikaku pulampa Aipuramaku, panya iriti Aipuramalu tjana palumpa malpa tjutangku kulu pikangu pungkula wiyanu mayatja kutjara kutjara tjanampa tjaultji tjuta kulukulu. Munuya tjanampa kutjupa kutjupa tjuta mantjira katingu ngurakutu. Ka panya ngururpa wati Milkitja-tikanya ngalya-ngaparikatingu Aipuramanya wati-pitjanyangka nyakula munu palunya pukulmanu alatji wangkara, “Godalu nyuntunya wirura kanyinma marangku.”*

Ka palulanguru Aipuramalu kutjupa kutjupa tjuta tjana mantjira katinytja tjarara tjukutjuku ungu Milkitja-tikanya mayatja pulka kulira.* ⁴ Panya Milkitja-tikanya-mantu mayatja pulka mulapa kutjupa tjutangka waintarinytja, ka Aipuramalu Israelkunu tjutaku tjamu nganmanytjangku palunya ungu tjarara warmalanguru tjulyara katinytjatjanungku. Tjinguru Aipuramanya palu purunypa pulka mulapa nyinanyangkampa Milkitjatikalu tjarara ungama palunya. Palu wiya, Aipuramalu palunya tjarara ungu mayatja pulka kulira.

* 7:1-3 Genesis 14:17-20

* 7:1-3 Alatji Aipuramalu tjarara ungu kutjupa kutjupa uwankara paluru tjana katinytja utulura lipula tjunu utulu kutjupa utulu kutjupa 10-pa, munu palulanguru palunya utulu kutjutja ungu 10-nguru Milkitja-tikanya, munu utulu 9 palurunku kanyinu.

⁵ Ka panya nganaṅa Israelkunu tjuṅangu wati tjukurtjara tjuṅa ngurkantankupai anṅangu Levikunu tjuṅanguru.* Munula Moseku tjukurpa kulira nganaṅa kutjupa kutjupa tjuṅa kanyintjatjanungku tjaraṅa tjukutjuku ungkupai palunya tjananya tjukurtjara tjuṅa.* Uwa, tjana walytjanguṅu mantjilpai, panya paluru nganaṅa uwankara Aipuramalanguṅu. ⁶⁻⁷ Palu wati tjukurtjara nyanga Milkitja-tikanya Aipuramaku walytja wiya, wati malikitja, Levilanguṅu wiya. Munu paluru mantjinu Aipuramalu tjaraṅa ungkunyangka, munu palunya wangkara pukulmanu. Palu panya Godalu Aipuramanya nganmanytju kalkunṅu pulka nyinanytjaku, kala tjinguru kulini paluru mayatja pulka mulapa Milkitja-tikala waintarinytja. Palu wiya, nyangatja Milkitja-tikalu palunya wangkara pukulmanu nganmanypa pulka mulapa nyinanytjatjanungku. Panya nganaṅa ninti wati malatangku wati pulkanya alatji wangkara pukulmankupai wiya, palu wati pulkangku kutju pukulmankupai wati malatja. ⁸ Kulini nyura? Panya Milkitja-tikanya Aipuramala waintara pulka mulapa nyinangi, wati tjukurtjara tjuṅangka kulu. Panya paluru tjana mantjilpai Israelkunu tjuṅangu tjaraṅa ungkunyangka palu tjukurtjara paluru tjana ilura wiyaringkupai. Ka Milkitja-tikalu Aipuramala mantjinu kutju-ara paluru tjaraṅa ungkunyangka, munu palulanguru paluru yaaltjiringu? Wiya nyiringku tjakultjunanyi paluru wanka nyinanytja, ilunytja

* ^{7:5} Levinya panya Aipuramaku pakaliku katja, panya Jacobaku, iriti mulapa nyinanytja. * ^{7:5} Tjukurpa panya Godalu Mosenya ungkunyjtjangku alatji wangkanyi, “Kutjupa kutjupa uwankara nyura kanyintjatjanungku tjaraṅa tjukutjuku ungama wati tjukurtjara tjuṅa.”

wiyatu.*

⁹⁻¹⁰ Uwa, nganaṅa rawangku tjaraṅa ungupai wati tjukurtjara tjuṭa. Palumpa tjanampa tjamu nganṅmanyitja ini panya Levinya, panya Aipuramaku pakaliku katja. Ka panyaya tjukurtjara tjuṭa nyinakatingi malatja malatja Aipuramalanguṛu. Ka panya Aipuramalu Milkitjatikanya tjaraṅa ungu Levila kuwaripangka paluru tjana nyinanytja wiyangka. Paluru kutjungku ungu Milkitjatikanya, palu tjanampa kulu ungu nganṅmanyitju watarku-watarkungku, panya Leviku tjanampa palumpa walytjapiti malatja malatjaku kulu.

Jesunya Tjukurtjara Nyinanyi Milkitja-tikanya Purunypa

¹¹ Ka Moselu nintiningi tjukurpa panya Godalu palunya ungunytja, munu paluru wangkangi warṅka wati tjukurtjara tjuṭaku kulu. Ka palumpa kuṭa Aaronṅa tjukurtjara nganṅmanyitja nyinangi. Wati panya paluru Levilanguṛu. Ka ngulalta palula malangka palumpa walytjapiti malatja malatja tjukurtjara tjuṭaringangi. Nyanga paluru tjana panya uwankara Leviku tjamupiti malatja malatja wanapari wanapari. Palu Israelkunu tjuṭangku tjukurpa panya Godalu Mosenya ungunytjanguṛu nintiringu yaaltji-yaaltji tjukaṛuru nyinanytjikitja, munuya nintiringu kura palyantjatjanungku kuka katira ungunytjikitja wati tjukurtjarangku pungkula Godanya ungunytjaku paluru tjananya kura palyantjitjanguṛu kaly-pangku pungkuwiyangku wantinytjaku. Palu nyanga alatji palyaraya Godala mirangka tjukaṛuru ngaranytja wiya. Panya ara nyanga nganṅmanyitja wanaraya puṭu nguwanpa palyaringangi tjukaṛuru ngaranytjikitja Godala mirangka.

* 7:8 Genesis 14:17-20

Ka nyara palulanguru Godalu tjukurtjara kutjupa iyanu ini Jesunya, panya tjukurtjara nganmanyitja tjutangu anangu tjuta putu palyaningi Godala mirangka tjukaruru ngaranytjaku. Palu Jesunya tjukurtjara kutjupa mulapa, Aaronnga tjana purunypa wiya, palu Milkitja-tikanya purunypa. ¹² Panya Godalu Jesunya tjukurtjara iyara ara panya nganmanyitja kampa kutjupanu. Munu paluru wati tjukurtjara tjutaku warka wiyanu munu kampa kutjupanu. Ka nganana kuwari ara kutjupangka nyinanyi ara kuwaritjangka. ¹³⁻¹⁴ Panya ara nganmanyitjangkaya Levilanguru kutju tjukurtjara nyinapai, palu Jesunya tjukurtjara kutjupa Leviku walytjapitinguru wiya, palu Judah-ku walytjapitinguru. Panya Judah-nya tjana walytjarara walytjarara tjukurtjara nyinanytja wiyatu, panya Moselu tjananya wangkanytja wiya kuka pungkula Godanya untkunytjaku paluru anangu tjutaku kalyparingkunytjaku. Wiya, paluru Levikunu tjuta kutju wangkangu. Kala nyanga palulanguru kulini ara panya nganmanyitja wiyaringu, kala ara kuwaritjangkalta nyinanyi.

¹⁵ Uwa, mulapa Godalu ara nganmanyitja kampa kutjupanu, panya paluru tjukurtjara kutjupa mulapa ngurkantanu Milkitja-tikanya purunypa, Aaronnga tjana purunypa wiya. ¹⁶ Panya ara nganmanyitjangkaya tjukurtjara tjuta ngurkantara tjunkupai Leviku walytjapitinguru. Palu tjukurtjara nyangatja Levikunu wiya. Paluru panya wanka titutjara nyinanyi wiyaringkunytja wiya alatjitu, ka nyara palulanguru Godalu palunya ngurkantara tjunu tjukurtjara nganampa nyinanytjaku. ¹⁷ Panya iriti nyiringka walkatjunkunytja nyanga alatji ngaranyi,

“Nyuntun tjukurtjara pulka titutjara nyinaku Milkitja-

tikanya purunya ilunytja wiya.” *

Alatji Godalu Jesunya wangkangu.

¹⁸⁻¹⁹ Uwa, ara nganmanyitja wiyaringu, panya ara nyara paluru kunpu wiya kurakura ngarangi, panya ara nyara palulawanu nyinara anangu tjuta putu tjukaruru nyinangi. Ka nyara palulanguru Godalu ara panya palunya kampa kutjupanu munu ara kuwaritja wiru mulapa palyanu nganana mulamularingkula palula tjunguringkunytjaku.

²⁰⁻²¹ Pirukula wanyu nyangatja kulinma! Panya Jesunya tjukurtjararingkunyangka Godalu palunya wangkangu alatji,

“Ngayuluna nyuntunya mulamulangku kalkuni mununa ngayulu piruku walytjangku kulra kampa kutjuparinytja wiya.

Panya nyuntun tjukurtjara pulka titutjara nyinaku wiyaringkunytja wiya.” *

Palu panya tjukurtjara nganmanyitja tjuta kalkuntja wiyatu tjana titutjara tjukurtjara nyinanytjaku. Wiya, paluru Jesunya kutju kalkunu. ²² Ka nyara palulanguru Jesulu ara kuwaritja titutjara ngaranytjaku kanyini. Ara nyara paluru panya Mosenya ungkunytja purunya wiya, ara kutjupa wiru mulapa.

²³⁻²⁴ Kaya nyangatja kulu kulila kutjupa ngapartji. Panya tjukurtjara tjuta mulapaya nyinakatingi, munuya tjukutjuku warkarira tjilpiringkula ilungi, kaya kutjupa tjuta ngapartji warkarangi. Palu Jesunya kulinma paluru titutjara nyinaku ilunytja wiya alatjitu. Nyara palulanguru panya paluru kutju tjukurtjara pulka titutjara nyinaku wiyaringkunytja wiya. ²⁵ Ka pala palulanguru anangu uwankara

* 7:17 Psalm 110:4 * 7:20-21 Psalm 110:4

palumpa mulamularingkula Godalakutu pitjanyaangka paluru tjananya mulapa wankarunkuku Godala tjungu pukulpa nyinanytjaku. Panya paluru wanka titutjara nyinanyi munu tjanampa rawangku Mamala tjapini wiyaringkunyitja wiyangku.

²⁶ Panya ara nyanga kuwaritjangka Jesunya kutju nganampa tjukurtjara pulka nyinanyi munu nganampa kutjupa kutjupa uwankara tjukarurungku palyalpai. Paluru nganmanyitja tjuta purunypa wiya. Paluru panya tjukaruru mulapa nyinanyi munu kuralpai wiya alatjitu. Paluru kuraku ngurpa anangu tjuta purunypa wiya. Paluru kutjupa alatjitu, palya mulapa. Munu paluru mayatja pulka mulapa uwankarangka waintara nyinanyi Godala tjungu ngura nyara ilkarangka. ²⁷ Paluru wati tjukurtjara pulka purunypa wiya, panya tjukurtjara paluru putu palya mulapa nyinapai munu kura palyalpai. Palulangu ru paluru kuka pungkula tiliwakalpai Godalu nyakula palunya munu anangu tjuta kulu kura tjuta palyantjitjangu ru kaly pangku wantinytjaku. Munu tjukurtjara panya paluru alatji titutjarangku palyalpai tjin tu kutjupa tjin tu kutjupa. Palu panya Jesunya palu purunypa wiya, panya paluru kutju-arangku palyanu munu ngalkilpa ilungu anangu uwankaraku kurangu ru, ka nyara palulangu ru Godanya anangu tjutaku kalyparingkupai.

²⁸ Nyura uti kulini? Panya Moseku tjukurtu wangkangi wati tjukurtjara pulka anangu tjutangu ru ngurkantara tjunkunyitjaku. Palu wati paluru tjana titutjara upa nyinangi, panya paluru tjana ngana pu purunypa anangu alatjitu. Uwa, Godalu ara panya nganmanyitja tjananya ungu, palu malangkalta paluru mulamulangku kalkunu ara kuwaritjaku, munu ngurkantara tjunu palumpa katja tjukurtjara pulka nyinanytjaku ara nyanga kuwarit-

jangka. Ka paluru panya Godanya mukuringkuntja uwankara tjukarurungku palyara wiyara wiru mulapa titutjara nyinanyi.

8

Jesunya Tjukurtjara Pulka Ara Kuwaritjaku

¹⁻² Palu tjukurpa nyangatjana nyurala nyaaku wangkanyi? Wiya panya nyura kulira tjukurpa pulka kulintjaku nyangatja Jesunya panya nganampa tjukurtjara pulka nyinanyi Mayatja Godala tjungu ngura ilkaritjangka. Munu paluru warkarinyi ngura milmilpa mulata panya Godalu palyantjitjangka ngura panya ilkaritjangka. Paluru tiinta milmilpa panya Moselu tjana nganmanyju palyantjitjangka warkarinytja wiyatu. ³ Panya nyura ninti Godalu tjunu wati tjukurtjara tjuta anangu tjutanguru mai kuka kulu mantjira palunya ma-ungkuntjaku. Ka uti nganampa tjukurtjarangku Jesulu kulu palu purunytjutu Godanya ungama panya paluru nganampa tjukurtjara pulka nyinanyi ilkarangka. ⁴ Palu tjinguru Jesunya mantangka rawatu nyinarampa tjukurtjara wiyatu nyinama, panya tjukurtjara tjutaya nganmanypa nyinangi wati Levilanguru munu panya paluru tjana Moseku tjukurwanu nyinara Godaku warkaringi tiinta panya milmilta.

⁵ Palu tiinta nyara palunyaya unytjungku mantangka kanyiningi. Panya tiinta nyara paluru nganannya nintini ngura kutjupa ilkarangka ngaranytja milmilpa mulapa. Panya iriti Mosenya tiinta panya palunya palyantjikitja palyany-palyanyarinyangka Godalu palula wangkangu alatji, “Ngayulu panya nanta apu katu wangkara nintinu tiinta milmilpa palyantjaku. Ka panya palu purunypa alatjitu palyala tjukarurungku.” Ka panya

Moselu tjana palyanu tiinta mantangka, ka tiinta nyanga mantatjangku ngura ilkaringka ngaranytja nintini.

⁶ Palu Godalu Jesunya warka wiru mulapa ungu, ka paluru ara kuwaritja pakaltjinganu palya mulapa, panya wati tjukurtjara kutjupa tjutangku palyantja purunypa wiya. Panya palurunku walytjangku ungunytja pulka mulapa tjukurtjara kutjupa tjutangku kuka ungunytja purunypa wiya. Panya Godalu Jesulawanungku kalkuntja pulka mulapa ngaranyi, Moselawanungku kalkuntja purunypa wiya. Ka nyara palulanguru Jesunya tjukurtjara pulka mulapa nyinanyi tjukurtjara kutjupa tjutangka waintarira. ⁷ Panya anangu tjutangku ara irititja wanara putu wankaringangi. Ka nyara palulanguru Godalu ara kutjupa kuwaritjalta pakaltjinganu.

⁸ Palu Godalu nyangu palumpa anangu tjuta kuraringkunyangka, panya anangu nyara paluru tjanaya palumpa ara Mosenya panya ungunytjitja wanalwiyangku wantinyngka. Munu paluru tjanala wangkangu nyanga alatji,

“Kulilaya Jew tjutangku ngura Israelta munu Judah-la nyinanytja tjutangku!

Ngayulu ngula palyalku nyurampa ara kutjupa kuwaritja.

⁹⁻¹⁰ Palu ara kuwaritja panya nganmanyitja purunypa wiya.

Panya iriti ngayulu ara nganmanyitja wangkangu Mosela tjanala ngura panya Itjipalanguru katinytjatjanungku.

Ka panya paluru tjana kulira wantira tungunpungu, kana palulanguru tjananya wantingu.

Palu nyangatja panya ara kuwaritja ngayulu kalkuni Israelkunu tjuta tjana titutjarangku kulilkatinytjaku.

Ngayulu ngayuku tjukurpa tjanala unngu nintilku tjana ara nyanga palunya pina alaringkula tjukarurungku kulintjaku.

Kaniya ngayunya kutju mulamulangku walkulku munuya ngayuku walytjapiti mulapa nyinaku.

¹¹ Palu uwankarangkuniya ngayunya tjukarurungku ngurkantankuku,
ka kutjupangku anangu kutjupa arkara wituwitungja wiya Mayatjaku nintiringkunytjaku.

Panya uwankarangkuniya alatjitu ngurkantankuku,
anangu kuranyitja tjutangku munu anangu malatja tjutangku kulkulu.

¹² Kana ngayulu ngaltunytjungku tjana kura palyantjitjanguru tjananya kalypangku wantiku,
mununa tjana kura palyantjitjaku watarkuriku alatjitu piruku kulintja wiya.” *

Alatji Godalu iriti wangkangu anangu tjutangka ara kuwaritja palyantjikitjangku.

¹³ Ka nyura kulini? Panya ara nyanga kuwaritja wangkara utira Godalu ara nganmanyitja wiyaringkunytjaku wangkangu, ka panya kuwari nguwanpalta wiyaringanyi.

9

Tiinta Milmilpa Mantatja Munu Ilkaritja

¹⁻³ Palu ara nganmanyitjangka Godalu tjukurpa tjuta wangkara ungu tjana kulria tjukarurungku palunya walkuntjaku inmangka. Munu tjukurpa kutjupa tjuta wangkara ungu tiinta milmilpa tjukarurungku palunyatu palyantjaku inmaku. Kaya mulapatu palyanu tiinta panya palunya munuya pala palula inma kanyiningi.

* 8:12 Jeremiah-ku 31:31-34

Ka tiinta panya paluru kampa kutjaratjara, kampa tjangatitja ngura milmilpa, ka kampa kutjupa munkaritja ngura milmilpa mulapa, ka ngurur-kutjara mantara wiru waraly-waralyngarala angatjunangi kampa nyara munkaritja. Ka kampa tjangatitjangka punu tili tjuatjara ngarangi. Ka taipula kulu ngarangi mai nyumatjara panya milmilmaꞤa Godanya ungkunyitja.

⁴ Ka kampa munkaritjangka ngura panya milmilpa mulata piti gold-nguru palyantja ngarangi. Ka piti unngu kutjupa kutjupa ngaringi panya tjana kutjalpai wiru pantinytjaku. Ka pakutja pulka panya kalkuntjitja kulu kampa pala palula ngaringi pununguru gold-nguru palyantja. Ka pakutjangka unngu walpayata purunypa gold-nguru palyantja ngarangi mai panya manna-tjara. Ka Aaronku tjukara kulu ngaringi pakutjangka unngu. Panya iriti punu tjalytjaruru tjuꞤa pakuꞤu tjukara pala palula. Ka apu tjiwa kutjara kulu pakutja palula unngu ngaringi, tjukurpa panya pulka tjuatjara panya Godalu walkatjura ungkunyitja. ⁵ Ka pakutja pala palula katu angelpa purunypa kutjara nyinangi nyalpitjara gold-nguru palyantja. Nyanga paluru pula panya Godanya nyinanytja utini. Munu pula nyalpi kutjara lipiringkula ngaparku nyinara pakutja angatjutura nyinangi. Ka palula pulala ngururpa nyinara Godalu anangu tjuꞤaku ngalturingkupai, munu tjukurtjara pulkanku pakutja palunya milkalingka kurpinyangka paluru anangu tjuꞤa kura tjuꞤa palyantjijanguꞤu kalypangku wantipai pungkunyitja wiyangku. (Uwa, tjinguruꞤa tjukurpa kutjupa tjuꞤa wangkama tiinta nyanga palunyatjara, palu kuwarina wantinyi mutumuꞤu walkatjunkunyitjikitjangku.)

⁶ Ka panya tjana tiinta, munu pakutja panya, kutjupa kutjupa tjuꞤa kulu tjukarurungku palyara

wiyaṇu. Kaya palulanguru tjinṭu kutjupa tjinṭu kutjupa wati tjukurtjara tjuṭa tjarpangi tiinta panya kampa tjangatitjangka, ngura panya milmilṭa, munuya warṭa tjanampa palyaningi. ⁷ Palu kampa panya munkaritja milmilpa mulapa, ka wati tjukurtjara pulka kutju tjarpapai nyara palula, kulangka kutju tjuṭa-ara wiya, kutju-ara. Munu paluru maralpa tjarpanytja wiya, kukaku milkali pitingka katira kutju tjarpapai, munu Godanya nintilpai paluru nyakula palunya munu anangu tjuṭa kulu kalypangku pungguwiyangku wantinytjaku paluru tjana kura tjuṭa watarkungku palyannyangka.

⁸ Ka ara nyanga palula tjanalanguru Kurunpa Milmilṭu nganananya nintini nyanga alatji kulintjaku, panya ara nganmanyitja tiinta milmilpatjara ngaranyangka nganaṇa puṭu tjarpanyi kampa munkaritjangka panya milmilpa mulata. Nyanga paluru nganananya nintini panya nganaṇa puṭu Godala tjunguringanyi. ⁹ Ka pala palulanguru nganaṇa kuwari kulini ara panya nganmanyitjangku nganananya puṭu kurunpa palyani Godala tjungurungkunyitjaku. Panya tjana kuka mai katira ungunyangka Godalu tjananya kura palyantjitjanguṛu kalypangku wantipai, palu kurunpaya Godala tjungu mulapa nyinanytja wiya ngarangi. ¹⁰ Panya ara nganmanyitjitjangku kutjupa kutjupa tjuṭa wangkapai, panya mai kuka kutjupa kutjupa tjuṭa ngalkuntjaku munu kutjupa kutjupa tjuṭa wantinytjaku, munu kutjupa kutjupa tjuṭa tjikintjaku, kutjupa kutjupa tjuṭa tjikilwiyangku wantinytjaku. Munu piṛuku wangkapai yaaltjingara tjananku puntu tjukarurungku paltjintjaku, munu kutjupa kutjupa tjuṭa kulu paltjintjaku. Palu ara nyangantu uwankarangku puntutja wangkapai kurunitja wiya, panya ara nyanga paluru tjana unytju patara ngarangi Godalu ara kuwaritja utintjaku.

11-12 Palu panya Christanya tjukurtjara pulka nyinanyi ara panya kuwaritjaku. Panya paluru tjarpangu Godaku ngura milmita nganannya ngalkira wiru tjuta nganampa palyantjikitja. Palu ngura nyara palunya watingku palyantja wiyatu, panya nyaratja ngura mantatja wiya, ilkaritja wiru mulapa. Ka panya Jesulu milkali nanikutanguru puluka kulunypanguru mantjira katinytja wiyatu ngura nyara palulakutu. Palu palurunku ilura milkali palurunku tjutingu, munu ngura panya milmita ma-tjarpangu kutju-ara alatjitu, tjuta-ara wiya, munu nyara palulanguru paluru nganannya kuranguru wankarunu nganana Godala mirangka kunta wiya nyinanytjaku titutjara.

13-14 Ara panya nganmanyitjangku alatji wangkanyi panya watingku kutjupa kutjupa pampuntjatjanu putu tiinta milmita tjarpapai, palu uti paluru wati tjukurtjarangka nganmanypa wirkanama, ka paluru nanikutaku milkalingka, munu puluka nyitayiraku milkalingka kulu mantjira palunya puntu winki kurpinma, munu tjinguru puluka kungka kulunypa kampara tjunparingkunyitjita tjunpa mantjira minangka urura palunya kurpinmatu. Ka nyara palulangurulta wati paluru palyaringanyi Godanya walkuntjikitja tiinta nyara milmita tjarpapa.

Uwa, panya kukaku milkalingku tjunpangku kulu wati nyara palunya palyani Godanya walkuntjaku. Palu milkali nyanga kuka tjutanguru unytju kutju ngaranyi mantatja. Palu Christaku milkali palya mulapa uwankarangka waintarinytja. Panya Kurunpa Milmitu titutjara nyinapailu Jesunya kunpunnyangka paluru wiru mulapa nyinanytjatjanungku punu katakutjarangka ilura palurunku puntu winki Godanya ungu milkali tjutira. Nyara palulanguru paluru nganannya unngu tjukaruru, kala ara panya nganmanyitja tjuta palyantja

wiyaringu, panya ara palunya tjananya wanara nganana putu palyaringangi kuka pungkula rawangku ungkula ungkula. Palu panya Jesulu nganananya mulapa kulintja tjukarurunu nganana kunta wiya Godala tjunguringkula rapa nyinanytjaku munu palula wanganarangku kulira warkarinytjaku, panya paluru wanka alatjitu nyinanyi witulya pulkanya.

¹⁵ Uwa, Christalu ara kutjupa wirkakatingu kuwaritja Godalanguru nganampa palumpa walytja tjutaku, nganana mulamularingkula Godalu kalkuntjitja mantjin-tjaku. Panya Godalu nganananya ngurkantara kalkunu palula tjungu titutjara nyinanytjaku. Palu nyangatjale mantjini nganampa anga-ilunyangka kutju. Panya ara nganmanyitjangkala nyinakatira putu kuliningi kura wantinytjikitjangku, palu panya Jesunya nganampa ngalkilpa ilunyangka kutjula karalyarira wankaringu.

¹⁶⁻¹⁷ Ara nganampa alatji ngaranyi, panya nganana nyiringka walkatjura kalkulpai wanka nyinaralpi nyanga alatji ngayulu ilunyangka malangka uti ngayuku tjitji tjutangku mantjinma ngayulu kanyintja uwankara. Nyanga alatjila kalkulpai. Palu tjitji tjutangku ngayulu wanka nyinanyangka putu ngayuku uwankara mantjini panya nganana tjungu nyinanyi, palu kalkuntja nyanga paluru utiringkuku ngayulu ilunyangka kutju.

¹⁸ Ka nyanga palu purunypa ngarangi ara panya nganmanyitjangka, panya Godalu kalkuntja utiringangi kuka pungkunyangka kutju, palu kuka pungkuntja wiyangka wiyatu ngarangi. Panya kuka pungkula kutju milkali mantjira Godanya ungkupai, ka nyara palulanguru kutju Godanya tjanampa kalyparingkupai.

¹⁹ Panya Moselu tjukurpa uwankara Godalu ungkuntja tjanala wangkangu anangu panya uwankarangka. Munu palulanguru iluntanu puluka kulunypa, nanikuta

kulunypa munu mantjira milkali minangka tjungunu. Munu palulanguru punu mina tjukutjuku mankurpa katantanu nyalpitjara munu karpira tjungunu nyalpi winki puturu tjitin-tjitinta. Munu punu panya nyalpi winki karpintjitja kukaku milkalingka tjalatjunu munu nyiri Godaku tjukurtjara kurpinu milkalingka, munu anangu uwankara kulu. ²⁰ Munu paluru wangkangu, “Nyawaya milkali nyangatja, panya Godalu nyuranya tjukurpa pulka tjuta ungu nyura wanganarangu kulin-tjaku. Ka nyanga kukaku milkalingku nyuranya nintini panya tjukurpa nyanganpa kuwaringuru ma-ngaranyi.” Alatji Moselu tjanala wangkangu mulamulangku kulin-tjaku. ²¹⁻²² Ka panya Moselu kukaku milkali katingu tiinta milmilpa unngu munu tiinta kurpinu munu unngu panya ngaranytja uwankara kulu. Panya Godaku tjukurtu alatji wangkanyi, “Milkalingka kurpinnyangka kutju kutjupa kutjupa uwankara palya ngarapai Godala mirangka. Ka panya milkali ilura tjutinyangka kutju Godalu anangu tjutangku kura palyantjitjanguru kaly-pangku pungkuwiyangku wantipai.”

Christanya Milkali Tjutira Ilunyangka Kutju Godalu Nganananya Kalypanku Wantipai

²³ Ka panya tiinta nyara palunya munu unngutja tjuta kulu tjana arakara palyanu nyara ngura ilkaritjangka ngaranytja purunypa. Ka wati tjukurtjarangu kukaku milkalingka kurpilpai tiinta munu unngu ngaranytja uwankara kulu Godala mirangka palya mulapa ngaranytjaku. Palu tiinta nyara ilkaritja kukaku milkalingku putu palyani. Wiya, Christaku milkalingku kutju ngura nyara palunya palyani nganana tjarpara Godala tjungu nyinanytjaku. ²⁴ Panya Christanya tjarpanytja wiya watingku palyantjitjangka tiinta panya

milṁilṁta. Nyaratja arkaṛa palyantja ngura panya ilkaṛingka ngaranytja puṛunypa. Palu Christanya ngura ilkaṛitja mulata tjarpangu munu paluṛu Godala anga-wangkanyi nganampa ngalkiltu. ²⁵⁻²⁶ Palu wati tjukurtjara pulka kampa panya munkaritjangka milṁilpa panya mulata waintara tjarpapai kukaku milkaṛitjara kulṁi kutjupa kulṁi kutjupa. Palu Jesulu yaaltjiṁ arangku paluṛunku ungu? Paluṛu wanyu rawa ilaṁu-ilaṁu ilukatingi kuwaripatjaranguṛu alatjiṁ panya Godalu manta palyantjalanguṛu? Wiya, ngula mulapa tjiṁtu waṁalpi ilaringkunyangka paluṛu pitjangu munu paluṛunku ungu iluntankunytjaku kutju-ara alatjiṁ Godanya nganampa kalyparingkunytjaku.

²⁷⁻²⁸ Anangu uwankara kutju-ara ilunytjaku ngaranyi. Ka ilunyangka maṁangka Godalu nganaṁanya ngurkan-tankuku. Ka panya palu puṛunypa nganaṁa kura palyantjitjanguṛu Christanya kutju-ara ilungu nganampa ngalk-ilpa. Uwa, paluṛu walytja intjanuringu iluntankunytjaku Godalu nganaṁanya kalypangku pungguwiyangku wantinytjaku. Munu paluṛu ngula maṁaku pitjala piṛuku kuranguṛu ilunytja wiya anangu panya palumpa paṁara nyinanytja tjuṁta wankaṛu katiku.

10

¹ Tjukurpa panya Godalu Mosenya tjananya ungunytja, nyara paluṛu ngataṁpa ngaranyi ruwa nguwanpa. Panya tjukurpa paluṛu kuranyukutungku nintiningi ara kutjupa wiṛu mulapa Godalu kalkuntjitja. Palulanguru, ngataṁpa ngaranyangka, Moseku tjukurtu anangu tjuṁta puṁtu tjukaṛurulpai tjana Godala miṛangka palya ngaranytjaku. Panya tjukurpa paluṛu wangkapai Godanya ilaringkula walṁkuntjikitjangku kuka katira pungkula ungunytjaku palunya. Palu nyanga alatjiya

rawangku kulī kutjupa kulī kutjupa unγκula unγκula
puṭu tjukaṛururingangi munuya kura winkiṭu ngarangi
Godala mirangka.

² Tjinguruya kuka unγκula tjukaṛururingkulampa
Godala mirangka palya ngarama kunṭaringkuwiya
munuya palulanguru tjinguru kuka piruku katinytja
wiya ngarama palyaringkunyttatjanungku. Palu
tjana unγκula palyaringkunyttja wiya munuya rawaṭu
kuranguru kunṭaringangi Godala mirangka, ³ munuya
kulī kutjupa kulī kutjupa unγκula rawangku kuliningi
panya tjana kura palyantttatjanungku. ⁴ Panya nanikutaku
pulukaku milkalingku Godanya puṭu kalypalpai paluru
nganananya kura palyantttitjanguru pungkuwiyangku
wantinyttjaku.

⁵⁻⁶ Ka palulanguru Christalu mantakutu pitjanyttjikit-
jangku wangkangu alatji Godala,
“Nyuntu mukuringkunyttja wiya anṅangu ttjutṅangu nyun-
tunya rawangku kuka katira unγκunyttjaku.

Panya tjana kuka pitjilpangka ttjunkula katu
kurkaltjura wantipai kampara mulururinyttjaku
nyuntu ttjanampa kalyparingkunyttjaku.

Palu nyanga kuka pungkunyttitjanguru nyuntu
pukularipai wiya.

Panya nyuntuṅin witunu anṅangurira ilunyttjaku.

⁷ “Kaṅa palulanguru nyuntula wangkangu, ‘Uwa,
nyangatjana ngaranyi ngayulu nyuntu witunnyangka
wanganṅarangu kulira palyantttjikitja nyuntu mukur-
ingkunyttja uwankara.

Panya alatjiya iriti walkatjunu nyiringka, ngayulu
nyanga alatjirinyttjaku.’”*

Nyanga palunya Christalu wangkangu Godala.

* 10:7 Psalm 40:6-8

⁸ Palu ara Godalu Mosenya ungkunytjitjangu wangkangu alatji kuka mai katira palunya ungkunytjaku, kaya wanganarangu kulira palyaningi. Ka panya Christalu wangkangu, “Nyanga palumpa Godanya pukularinytja wiya, munu paluru kuka katira palunya ungkunytjaku mukuringkuntja wiyatu.” ⁹ Munu palulanguru wangkangu Godala, “Uwa, nyangatjana ngaranyi ngayulu nyuntula wanganarangu kulira palyantjikitja nyuntu wangkanyangka.” Alatji Christalu Godala wangkangu. Ka nyura kulini nyanga palunya? Panya Godalu ara irititja wiyanu munu kutjupalta tjunu kuwaritja palumpa katjawanungku.

¹⁰ Panya Jesulu wanganarangu kulira palyanu Godalu wangkanyangka, ka nyara palulanguru Godalu nganananya kura palyantjitjanguru kalypangu wantingu pungkuntja wiyangu. Panya palumpa katja walytja alatjitu intjanuringu munu nganampa ngalkilpa kutju-ara ilungu. Ka nyara palulanguru nganana Godala mirangka kunta wiya kalyparingkula nyinanytjaku ngaranyi.

¹¹ Panya wati tjukurtjara tjutangkuya rawangutu tjintu kutjupa tjintu kutjupa kuka pungkula Godanya ungkupai anangu tjutangku kura palyantjitjanguru. Palu anangu tjutayaya rawatu kunta ngarapai Godalu tjananya kura palyantjitjanguru pungkuntjaku patara. Panya tjukurtjara tjutangku kuka pungkula Godanya ungkula palunya putu kalypalpai paluru anangu tjuta pungkuwiyangu wantinytjaku. ¹² Palu Jesunya walytja intjanuringu kutju-ara alatjitu ilura, munu palula malangka paluru wankaringkula anu munu nyinakatingu Godala itingka mayatja pulka mulapa. Panya paluru kutju-ara ilunytjatjanungku Godanya kalypanu, ¹³ munu paluru kuwari patara nyinanyi Godalu

palumpa mirpantju tjuta tjaruntjaku tjanala waintarira mayatja pulka mulapa nyinanytjikitjangku.

¹⁴ Uwa, paluru kutju-ara ilura anangu uwankara kutju kutju palulakutu pitjanyangka kurangu ru piranmanu palula tjunguringkula titutjara kalypa nyinanytjaku. Panya palunya tjananya Godalu ngurkantanu palumpa walytjaringkunyjtaku. ¹⁵ Ka Kurunpa Milmiltu tjukurpa nyanga palunyatu ngananala tjakultjunanyi, panya paluru alatji wangkangu,

¹⁶ “Nyangatja ara kuwaritja ngayulu ngula nintilku.

Panya ngayulu ngayuku tjukurpa tjanala unngu nintilku tjana ara nyanga palunya pina alaringkula tjukarurungku kulintjaku.”

¹⁷ Ka piruku Godalu nyangatja wangkangu,

“Ngayulu tjana kura palyantjitjaku watarkuriku alatjitu piruku kulintja wiya.” *

¹⁸ Uwa, paluru anangu tjutaku kalyparingu munu tjananya kura palyantjitjanguru kalypangu wantipai. Kala wanyu Godanya kuka rawangu katira ungama nganampa kalyparingkunyjtaku? Wiya, ara panya nganmanyitja wiyaringu panya paluru alatjitu nganampa kalyparingu.

Uta Raparingkula Godala Titutjara Tjungu Nyinama

¹⁹ Uwa, walytja wiru tjuta! Nyanga palulangurula uti raparingkula Godala tjunguringama, panya Christalunku milkali palumpa tjutira alanu nganana Godaku ngura milmilpa mulata rapa tjarpanytjaku. ²⁰ Panya Jesunya ilunyaangka kutju mantara panya timpulangka waralywaralyngaranytjanya tjilpiraranu munu alaringu ngura panya milmilpa mulata nganana waintara tjarpanytjaku. Nyangatja paluru ilura iwara kuwaritja palyanu

* [10:17 Jeremiah-ku 31:33-34](#)

wankakutu Mamala tjunguringkula wankaru nyinanytjaku. ²¹⁻²² Kala uti raparingkula Godala ilaringama, panya Jesulu tjukurtjara pulkangku Godaku ngura milmilpa kanyini. Munu panya paluru nganannya kurunpa paltjiru Jesulu palumpa milkalangka nganana kanta wiya nyinanytjaku, munulanya piranmanu kapi kaltara wirangka palumpa walytja mulapa nyinanytjaku. Kala uti alatjinkunyangka kurunpa winki pukularira Godala ilaringama palumpa pulkara mulamularingkula kutju. ²³ Munula uti mulamularingkula Godaku alalangku patanma panya paluru nganannya kalkunu wirura kanyintjikitjangku munu palumpa ngurakutu katinytjikitjangku. Kala uti tungun-tunguntu kulinma watarkurinytja wiyangku titutjarangku, panya Godalu ngunti kalkulpai wiya tjukarurungku kutju wangkapai.

²⁴ Wanyula kulinma wirura nyinanytjikitjangku, munulanku wituwitunma anangu uwankaraku pulkara mukuringkunyitjikitjangku, munulanku ngaltunyitjungku alpamilantjikitjangku kulinma. ²⁵ Munula uti Godanya walkuntjikitja rawa tjunguringama, panya kuwari nyura kutjupattjara ngurangka nyinapai tjunguringkunyitja wiya. Palu wanyuya Tjintu Malatja kulinma panya watalpi ilaringanyi Jesunya malaku pitjanytjaku, kalanku uti uwankara rawatu tjunguringama munulanku kunpunma Christanya titutjarangku wanantjikitjangku.

²⁶⁻²⁷ Ka nganana panya ninti Christaku munu palumpa tjukurku kulu. Palu tjingurula nyanganpa kulira wantira kura titutjarangku palyannyangkampa Godanya yaaltjingara nganampa piruku kalyparingkuku? Wiya, panya Christanya nganmanypa ilungu, ka kutjupa munkara palu purunypa ngaranytja wiya nganampa kuranguru piruku ilunytjaku. Kala yaaltjiriku palunya wantirampa? Wiya kutju nganampa ngaranyi panya

nganana ngulu-ngulu patara nyinanytjaku Godalu nganananya ngula ngurkantara tjarantjaku Tjintu Malatjangka. Panya Godanya pulkara mirpanariku palula tungunpungkupai tjutaku munu paluru tjananya wiyalku, panya waru pulkangku kampara nyarulpai, palu purunytju uwankara wiyalku.

²⁸⁻²⁹ Panya anangu kutjupangku Moseku tjukurta tungunpungkunangka palunya pungkula iluntankunytjaku ngarapai. Panya anangu kutjarangku, tjinguru mankurtu, anangu palunya tungunpungkunangka nyakula wati mayatangka tjakultjungkupai, ka palunya iluntankunytjaku wangkapai ngalturingkunytja wiyangku. Palu anangu kutjupangku tjinguru Godaku katja anannyangkampa Godalu palunya tjituru-tjituru pulka mulapa palyalku. Munu tjinguru paluru Jesunya milkali tjutinytja nguntinmankunangka Godalu palunya mapalku alatjitu pungkuku. Munta tjinguru paluru Godaku Kurunpa ngaltunytjunya analku, ka Godalu palu purunypatu palunya pungkuku. Panya anangu nyara palumpa alatjitu Jesunya ilura tjutingu milkali, ka nyara palulanguru Godanya palumpa kalyparingu ara nyanga kuwaritangka. Ka paluru ara nyanga palunya tungunpungkula wantinyangkampa Godalu wantinytja wiyangku palunya pungkuku.

³⁰ Panya nganana ninti Godalu alatji wangkangku, “Ngayuku ara ngaranyi, panya anangungku ngayula tungunpungkunangka ngayulu palunya pikantankunytjaku ngaranyi.” Munu piruku paluru wangkangku, “Ngayuluna tjukarurangku ngurkantara tjaralku ngayuku walytja tjuta.” ³¹ Kaya wanyu kulinma! Godanya wanka alatjitu nyinanyi witulya pulkanya munulanya paluru kuwari nyanganyi. Kala wanyu ngulu-ngulu nyinama anannyangka pitjala nganananya pungkunytjaku-tawara.

³² Kulilaya panyatja, panya nyura nganmanypa Jesuku walytjaringkuny^tja Godalu nintinnyangka. Nyara palula arangka panya kutjupa tju^tangku nyuranya pulkara kurara pungangi, ka nyurampa ara wituwitu mulapa ngarangi. Palu ara nyara palulawanungku nyura tungun-tunguntu Jesunya wananingi wantiny^tja wiyangku. ³³ Panya kutjupa-ara tjana anangu tju^tangka mirangka nyuranya anara kurara pungkupai. Munu tjana Jesuku walytja kutjupa tju^ta kulu palu purunymankupai. Palu nyura panya palunya tjananya nyakula nguluringkula paturingkuny^tja wiyangku wantira palula tjanala tjunguringangi. ³⁴ Munuya Jesuku walytja kutjupa tju^ta tjailangka tjunkunyangka nyura panya ngalturingkula tjananya wirura kanyiningi. Munu panya kutjupa tju^tangku nyurampa ulytja uwankara tjulyara katinyangka nyura pukulpa nyinangi tjanampa mirpanariny^tja wiya, panya nyura nintingu kulinigi, “Ngayuku pukulpa kutjupa ngaranyi mantangur^tja wiya palu Godalanguru, paluru kalkuntjitja. Ka pukulpa nyara paluru wiyaringkupai wiya titutjara ngarapai.”

³⁵⁻³⁶ Uwa, nyura panya Christanya rawangku rapangku wananingi, palu pakuringkuny^tja wiyangkuya wantima. Panya Godalu nyuranya kalkunu wiru ungkuny^tjikitjangu nyura rawangku rapangku wanannyangka. Kaya tungun-tunguntu wananna, munuya palulanguru Godala wanganarangku kulirampa nyura Godalu kalkuntjitja mantjilku alatjitu.

³⁷⁻³⁸ Panya nyiringka iriti walkatjunkuny^tja alatji ngaranyi,

“Paluru kalkuntjatjanu mulapa pitjaku alatjitu kuwari nguwanpa, rawa ma-nyinany^tja wiya.

Kaya ngayuku walytja tju^ta mulamularingkula titutjara nyinaku,

palu tjinguruꞑaya ngayulanguru paꞑuringkunyaꞑka
ngayulu tjanampa pukularinytja wiya.” *

Nyanga palunya Godalu wangkangu.

³⁹ Ka nganaꞑa Godanya wanaꞑampa paꞑuringkuntja
wiya panya anꞑangu kutjupa tjuꞑa puꞑunypa wiya, panya
tjana Godanya wantira ma-paꞑuringkula kawankatipai
mirikutu alatjitu. Palu nganaꞑa rawa mulamularingama
Godaku, kalanya wankaꞑu kanyilku.

11

Godaku Mulamularingkuntja

¹ Palu nyaa Godaku mulamularingkuntja? Wiya, pa-
nya anꞑangu Godaku mulamularingkuntja nyanga alatji
panya paluru rapangku kulintjatjanungku nyinara paꞑani
Godalu kalkuntjitja utiringkuntjaku. Paluru panya puꞑu
nyanganyi kuꞑungku Godalu kalkuntjitja wirkankunt-
jaku, palu paluru nitingku kulini, “Mulapa paluru
kalkuntjatjanungku palyalku alatjitu.” ² Panya iriti Go-
daku walytja tjuꞑa palumpa mulamularingkunyaꞑka Go-
danya tjanampa pulkaꞑa pukularingi.

³ Ka nganaꞑa Godaku mulamularingkula nitingku
kulini panya paluru ilkaꞑi manta kulu wangkara palunu.
Kala nyanganyi paluru paluntjitja uwankara, palu puꞑula
nyanganyi yaaltjinguru paluntja, panya paluru arkayit-
janguꞑu palunu wangkangku kutju.

⁴ Uwa, wanyula kulinma anꞑangu irititja tjuꞑa Godaku
mulamularingkupai tjuꞑa.

Abelnga

Panya Godaku mulamularingkula Abeltu
tjukaꞑurungku kuka pungkula ungu Godanya palumpa
kuꞑangku Kaintu puꞑunypa wiya. Ka Godanya palumpa

* 10:37-38 Apakukaku 2:3-4

pukularingu munu Kainnga wantingu munu paluru mulamularingkunyangka wangkangu Abelnga, “Nyuntu ngayula mirangka tjukaruru ngaranyi.” Palu Abelnga iriti mulapa ilungu munu paluru nganannya kuwari nintini Godaku mulamularingkunytjaku.

Iinakanya

⁵ Ka Godaku mulamularingkula Iinakalu palunya pukulmanu, ka Godalu palunya wanka katingu. Panya nyiringka ngarinyi alatji, “Godanya pukularingu palumpa munu ilunytja wiya wanka katingu.” Kaya anangu tjutanku palunya putu nguriningi Godalu palunya katinyangka. ⁶ Palu ngayulu tjinguru Godaku mulamularingkunytja wiya nyinarampa palunya putu pukulmananyi. Panya ngayulu Godalakutu ilaringkunytjikitja mukuringkulampa uti palumpa mulamularingama panya paluru mulapa nyinanytjitjaku, mununa uti ngayulu mulamularingkula kulinma panya mulapa paluru anangu tjutanku wiru mulapa palyalpai palulakutu pitjanyangka.

Noah-nya

⁷ Ka Noah-lu Godaku mulamularingkula pauta pulka palyanu, panya Godalu palula nganmanytju wangkangu mina pulka mulapa iyantjikitjangku, mina panya tjana nganmanytju nyakunytja wiyatja. Ka paluru Godala kulintjatjanungku pauta palyanu munu walytja tjutantjara uru pulkangka-tawara tjarpara wankaruringu. Kaya anangu tjutanku Noah-nya purunypa mulamularingkunytja wiyangu wantingi, munuya Noah-nya wankaringkunyangka wiyaringu alatjitu kura nyinanytjatjanu. Palu Noah-nya Godaku mulamularingkunyangka Godalu palunya walytjanmara

wangkangu, “Mulapa nyuntu ngayula mirangka tjukaruru ngaranyi.”

Aipuramanya

⁸ Ka panya Aipuramanya Godaku mulamularingkula parari anu ngura ngurpatjakutu. Panya Godalu ngura palumpa wantikatira ankunytjaku alatji wangkara kalkunu, “Ngayuluṅa ngura kutjupa nyuntunya ungkuku.” Ka Godalu wangkanyangka paluru kulira wanganara pakara watarku anu munu putu kulinigi, “Yaaltjikutuṅa nyangatja ananyi?”

⁹⁻¹⁰ Munu paluru Godaku mulamularingkula malikitja purunypa nyinangi tiinta palyara ngura panya kalkuntjitjangka wirkara. Ka palumpa katja Isaacanya munu palumpa pakali Jacobanya kulu ngura nyara palula wirkara nyinangi, panya Godalu tjananya kulu kalkunu ngura nyara palula nyinanytjaku. Palu Aipuramanya tiintangka pukulpa nyinangi malikitja purunypa ngura panya palula panya paluru nintingku kulinigi, “Nyangatjana unytju nyinanyi ngura nyanga mantangka, panya Godalu ngura kutjupa pulka palyanu ngayuku wiru mulapa, kana ngura nyara palumpa patara nyinanyi. Ka ngura nyara paluru panya kampa kutjuparinytja wiya paluruṅu ngaraku titutjara.”

¹¹⁻¹² Munu paluru Godaku mulamularingkula tjitji utinu, panya paluru wati tjilpi ka palumpa miita Tjiiranya minyma pampa iti putu kanyilpai. Palu panya Godalu kalkunu tjitjiku, ka Aipuramanya mulamularingu palumpa panya paluru tjukarurungku wangkapai. Uwa, Aipuramanya panya wati tjilpi nyinangi tjitji putu utilpai, palu palula kutjunguruya walytjapiti mungilyiringu

kililpi ilkaritja tjuṭa puṛunypa, munu paki kuluny-
kulunypa tjuṭa panya karungka ngarinytja puṛunypa,
mungilyi mulapa.

¹³ Uwa, wati panya paluru tjana munu Aipuramanya
tjana kulu Godaku rawa mulamularingangi titutjara wi-
yaringkuntja wiya ilunytjakutu-wangkara. Palu pa-
nya tjana wanka nyinara mantjintja wiya Godalu panya
kalkuntja. Palu tjana nganmanytju kuliningi ngula utir-
ingkunytjaku munuya pulkara pukularira wangkangi,
“Nganaṇa unytju akatjari mantangka nyanga nyinanyi.”

¹⁴ Ka panya tjana alatji wangkanyangka nganaṇa kulilpai,
“Munta-uwa, tjana nyinara paṭanangi ngura kutjupaku.”

¹⁵ Tjinguru wati nyangantu ngura tjananku wantikatinyt-
jatjanu kulira watjilarima, munuya mukuringkula malaku
wantira anama.

¹⁶ Palu wiya, paluru tjana ngura
nyara palunya kulintja wiya panya tjana ngura kutju-
paku mukuringangi ngura wiruku, panya ilkaritjaku.
Ka palulanguṛu Godanya palunya Mama walkunnyangka
tjanampa pukularipai kunṭaringkuntja wiya, panya
paluru tjanampa ngura pulka mulapa palyanu.

¹⁷⁻¹⁹ Ka Aipuramalu Godaku mulamularingkula katja
palumpa Isaacanya katingu iluntara Godanya ungkun-
ytjikitjangku. Panya Godalu palula wangkangu arakara
nyakunytjikitjangku wanganarangku kulinyangka. Palu
panya nganmanytju Godalu Aipuramanya kalkuntjitja
ngarangitu palumpa katja Isaacalanguṛu walytjapiti
tjuṭaringkuntjaku. Ka nyara palulanguṛu paluru katja
palumpa iluntankuntja kuwaripangka kuliningi, “Go-
dalu mulapa ilunyangka wankalku.” Ka Godalu mulapaṭu
ungu palumpa katja malakungku. Panya wati ilun-
yangka Godalu wankalpai, palu puṛunypa Godalu palunya
nguanpa iluntankunyangka wankaṇu.

Isaacanya

²⁰ Ka Isaacalu Godaku mulamularingkula katja kutjara pukulmanu Jacobanya pulanya Iitjunya alatji kalkura, “Panya Godalu nyupalimpa wiru tjuta ngula palyalku.”

Jacobanya

²¹ Ka Jacobalu Godaku mulamularingkula palu purunytjutu pukulmanu palumpa katja tjuta alatji wangkara, “Panya Godalu nyurampa wiru tjuta ngula palyalku.” Alatji paluru nganmanytju wangkangu malangka ilunytjikitjangku. Munu paluru patany-patanytju ngarala tjukatjarangku walkuningi Godanya.

Josephanya

²² Ka Josephalu Godaku mulamularingkula nintingku kuliningi panya Israelkunu tjutangku ngula ngura Itjipanya wantikatiku. Munu tjilpiringkula paluru palumpa walytja tjutangka utingku wangkangu nguwanpa ilura palunya tarka ngula katinytjaku Itjipalanguru Israeltakutu.

Mosenya

²³ Ka Moseku ngunytjungku mamangku Godaku mulamularingkula palunya kutitjunu pira mankurpa iti wirkankunyangka. Panya Itjipaku mayatjangku Piiralu palumpa tjaultji tjutangka wangkangu iti nyitayira tjuta iluntankunytjaku. Palu mamangku ngunytjungku pula nguluringkuwiyangku kutitjunu iti panya palunya, panya paluru pula nintingku ngurkantanangi, “Iti nyangatja wiru mulapa.”

²⁴⁻²⁶ Ka ngula Mosenya pulkaringkula paluru kulu Godaku mulamularingkula Mayatja Piiraku ngura wantikatira palumpa walytja tjutakatutu anu. Panya paluru alatji kuliningi, “Tjinguruna Piiraku walytja

tjutangka tjungu rawatu nyinarampa ngayulu Godaku watarkurira kura tjuta unytjungku kutju pukularira palyanma. Palu ngayulu tjananya wantikatira Godaku walytja tjutangka tjunguringkula pikangka alatjitu nyinanyi panya Itjipanya ngurara tjutangku ngananananya kurra punganyi. Tjinguruna Itjipanya ngurara tjutangka tjungu nyinarampa kutjupa kutjupa wiru tjuta mantjinma. Palu ngayulu wantira pikawanu nyinanyi ngayuku walytja tjutangka tjunguringkula, panya ngananalanguru mayatja pulka ngula utiringkuku nganampa wankarunkupainya.” Uwa, Mosenya nyanga alatji nyinangi panya paluru piruku kutjupa munkaritja kuliningi ngula Godalu kalkuntjatjanungku ungkunytajaku.

²⁷ Munu piruku Godaku mulamularingkula Moselu ngura Itjipanya wantikatingu. Panya paluru nguluringkunytajia wiya Mayatja Piirananya palumpa mirpannarinyangka. Paluru tungun-tunguntu wananingi Godanya uti nyakula purunytajia. Palu kurungku nyakunytajia wiya unngu kutju mulamularingangi.

²⁸ Munu Godaku mulamularingkula Moselu wangkangu anangu tjutangka kukaku milkalingka wali tjananku tuwa urilitja nyitintangku angeltu pitjala nyakula katuwanu ankunytajaku tjanampa katja ngannanyitja tjuta iluntankunytajaku-tawara. Nyara palula arangka paluru palyana inmangka tjunguringkula angelpa katuwanu ankunytajanya rawangku kulintjaku.

²⁹ Kaya Godaku mulamularingkula Mosenya tjana anangu tjuta kulu ngura uru ini Tjitin-tjitinta ngururwanu itipiringu manta piltingka. Kaya wati panya Itjipanya ngurara tjutangku tjananya malawanungku wataparara urungka ngururpatu ilungu urungku malakungku tjananya tjutunnyangka.

Tjatjuwanya Tjana

³⁰ Ka Tjatjuwanya tjana Israelkunu tjuta kulu Godaku mulamularingu munuya Godalu wangkanyangka wanganarangku kulira tawunu panya Jerichola tjuntu 7-ara para-arintanangi, ka wall panya pulka para-arintara ngaranytja pilukatingu.

Rayapanya

³¹ Ka minyma panya wati tjutangka kampangkatu ngaripainya ini Rayapanya Godaku mulamularingkula wankaringu. Panya pilukatinytja kuwaripangka Tjatjuwalu wati kutjara iyanu Jerichola tjarpara kampangkatu para-nyakula malaku pitjala tjakultjunktytjaku. Ka pula Jerichola wirkankunyangka, Rayapalu palunya pulanya Jerichonya ngurara tjutaku ngulungku mantjira kutitjunu palumpa ngurangka iluntankuntjaku-tawara. Nyara palulanguru paluru wankaringu, panya malangkalta Israelkunu tjutangku Jerichonya ngurara kutjupa uwankara iluntanu Godanya kulira wantinyangka.

Godaku Mulamularingkupai Tjuta Iriti Nyinanytja

³² Wanyuna piruku nyurala tjakultjunktu anangu mulamularingkupai kutjupa tjuta? Wiya wanti, panya tjuta mulapa ngaranyi wangkara wiyantjaku wiya, panya Kitiyannga, Parakanya, Samsonnga, Tjaipatjanya, Davidanya, Samuelnga munu wangkatjara kutjupa tjuta kulukulu panya winki mulapa. ³³ Wati nyanga paluru tjana Godaku mulamularingkula ngura walytjangku anga-kanyiningi warmalangku pitjala tjulyantjaku-tawara ngura kutjupitja tjutangku. Munuya ngura tjananku tjukarurungku kanyiningi anangu tjuta pukulpa palya nyinanytjaku. Munuya nyangangi Godalu panya kalkuntjitja tjuta utiringkunyangka.

Panya kutjupa tjutangku Godaku mulamularingkula lion tjuta tjaa patiningi patjantjaku-tawara. ³⁴ Kaya tjara kutjupa Godaku mulamularingkula waru pulkangka wankaru ngarangi kampanytja wiya. Kaya kutjupa tjuta Godaku mulamularingkula wankaringangi tjananya tjulangka wakara iluntankunytjikitjangu arunnyangka. Kaya kutjupa tjuta upa ngarala Godaku mulamularingkula kunpuringangi. Kaya tjaultji tjuta Godaku mulamularingkula witulya pulkatjararingkula warmala ngura kutjupitja tjuta pika pitjanyangka pungkula wiyaningi. ³⁵ Kaya minyma tjutangku purkutjararingkula Godaku mulamularingkula nyangu Godalu tjanampa tjitji malakngku wankannyangka.

Kaya tjara kutjupa Godaku mulamularingkula ilungi, panya mirpantju tjutangkuya tjananya nguluningi wangkara, “Nyura Godanya wantinyangkala nyuranya walatjungkuku iluntankunytja wiyangu.” Kaya kuliningi, “Wiya, nganana Godanya wantinytja wiya. Palyantilanyaya nganananya pungkula iluntanama panya Godalu nganananya wankalku palula tjungu wanka mulapa titutjara nyinanytjaku.” Alatjiya kuliningi, kaya mirpantju tjutangku tjananya putu ngulutjingara pungkula iluntanangi. ³⁶ Munuya mirpantju tjutangku Godaku walytja kutjupa tjuta ananingi, munuya wiipangka alkaningi, munuya kutjupa tjuta tjiinangka karpira tjailangka tjarpatjura kanyiningi. ³⁷⁻³⁸ Munuya kutjupa tjuta pulingka atura iluntanangi, munu kutjupa tjuta wanka winki kultu karilpa katara kutjaranangi, munuya kutjupa tjuta wakara iluntanangi tjula pulkangka.

Kaya tjara kutjupangu tjiipiku nanikutaku miringuru ulytja palyara tjarpangi munuya ngalutjara tjuta purunypa para-ngarangi mani wiya mai wiya

paltjatjiratja alatjitu. Kaya anangu tjutangu tjananya nyakula analpai munu kurara pungkupai. Panya tjanaya mantatjaku mukuringkula putu ngurkantanangi palya mulapa nyinanyangka. Kaya tjana ilytjingka waara parangarangi pilangka puli katu kullukulu. Munuya kullpingka pitingka kullu nyarkara nyinangi.

³⁹⁻⁴⁰ Ka Godanya pulkara pukularingi anangu nyanga palumpa tjanampa, panya tjanaya palumpa pulkara mulamularingangi. Palu panya Godalu kalkuntja tjana nyakuntja wiyatu munuya ngannmanypatu ilungi palumpa mulamularingkula kutju. Panya Godalu ngannmanytju nganampa palyara wantingu wiru mulapa. Panya paluru mukuringangi nganananya tjanala tjungura wirura palyarungura kanyintjikitja palumpa mulamularingkupai uwankara.

12

Godanya Nganampa Mama Nyinanyi munu Nganananya
Tjukarurulpai

¹⁻² Ka tjana kuwari nganananya ngarala nyanganyi winkingku Godaku mulamularingkupai miri tjutangu. Kala nganana kullu uti Jesunya tungun-tunguntu wananma. Panya watingku paluru-warara wirtjapakara wirkankunytjikitjangku mantara arara tjunkupai tarpipungkula punkatjingantjaku-tawara. Palu purunypala uti kura kutjupa kutjupa uwankara wantira Jesunya wananma pakuringkunytja wiyanguki titutjarangu ilunytjakutu-wangkara. Panya Jesulu iwara alanu nganana kullu Godala wirkankunytjaku munulanya alpamilani pakuwiyanguki palunya wanantjaku munu panya paluru patani ngura nyara palula nganana ngapartji ma-wirkankunytjaku.

Ka panya kutjupa kutjupa tjuꝛangku mantatjangku nganaꝛanya angatjunkunyangkala uti wantima munula tiꝛutjarangku Jesunya waꝛanma. Panya paluꝛu pakuringkunyꝛtja wiyangku palumpa Mamaku palyaningi munu puꝛu kaꝛakutjarangka ilunytjikitja nguluringkunyꝛtja wiya. Ka panya aꝛangu tjuꝛangku palunya ananingi wati kura-palku kulira.* Palu paluꝛu rapa alatjitu ilungu panya paluꝛu waintara kuliningsi palumpa Mamangku palunya pukulpa pulka mulapa ungkunyꝛtjaku. Munu alatji palyantjatjanu paluꝛu kuwari Godala itingkalta nyinanyi mayatja pulka mulapa. ³ Ka nyura uti palunya kulira raparingama, panya Jesunya mantangka nyinanyangkaya aꝛangu kura tjuꝛangku palunya pulkara kuraningi munu ananingi, ka paluꝛu tungun-tunguntu alatjitu ngarala palyaningi palumpa mamangku wituntjitja pakuringkunyꝛtja wiyangku. Ka nyuranya palu puꝛunypatu kurannyangka Jesunya kulinma, munuya palu puꝛunypatu tungun-tungunpa ngarama tjituru-tjitururira wantinyꝛtja wiya.

⁴ Uwa, aꝛangu kura tjuꝛangku nyuranya arakara kurani Godanya wantinyꝛtjaku, ka panya nyura tungun-tunguntu tjananya kulira wantinyi. Palu tjana nyuranya Jesunya puꝛunypa pungkula iluntankunyꝛtja wiya palunya waꝛannyangka. Tjinguruya nyuranya ngula pungkula iluntankuku rawangku waꝛannyangka. ⁵ Palu tjinguru nyura watarkuringu nyiringka panya iriti walkatjunkunytjijaku. Panya tjukurpa paluꝛu ngaranyi nganaꝛa kulira raparingkunyꝛtjaku, panya Godalu katja tjuꝛa paintja nyanga alatji ngaranyi,
 “Kulila! Mayatja Godalu nyuntunya tjitji puꝛunypa

* 12:1-2 Ngura nyara palula aꝛangu tjuꝛangku kulilpai wati kura tjuꝛa kutjuya iluntankupai puꝛu kaꝛakutjarangka.

tjukarurulpai palulawanu nyinanytjaku,
 kan uti palula wanganarangku kulinma panya
 paluru nyuntunya ngunti palyannyangka pailpai.
 Uti nyuntu kuranguru painnyangka kulira tjituru-
 tjitururinytja wiyangku wantima.

⁶ Panya paluru pulkara mukuringanyi palumpa katja
 untalpa tjutaku,
 munu pala palulanguru tjananya tjukarurulpai,
 munu kuraringkunyangka tjananya pungkupai tjana
 tjukaruru nyinanytja-tjiratjangku.” *

⁷ Kulini nyura? Nyurampa kutjupa kutjupa wituwitu
 ngaranyangkaya mirpanariwiyangku Godanya kulinma
 panya paluru nyuranya Mama wirungku tjukaruruni.
 Panya wati mamangku palumpa katja tjukarurulpai, palu
 purunypatu Godalu tjukarurulpai palumpa tjitji tjuta.

⁸ Palu tjingururu ngayunya Godalu wantima tjukaruruntja
 wiyangku, kana palulanguru kulilku, “Munta, tjinguruna
 ngayulu palumpa tjitji wiya, mungutja, amatjara wiya.”
 Panya Godalu palumpa tjitji uwankara tjukarurulpai
 kutjupa tjuta wantinytja wiyangku.

⁹⁻¹⁰ Panya nganana tjukutjuku nyinanyangka
 nganampa mama tjutangu nganananya tjukaruruningi
 tjana wiru kulintjatjanungku mama panya
 mantatja tjutangu. Kala tjana wangkanyangka
 nganana wanganarangku kulinigi. Palulangurula
 uti Mama ilkaritjangka ngapartji pulkaratu
 kulinma mulamulangku palula tjungu pukulpa
 nyinanytjikitjangku. Panya paluru nganananya
 alpamilantjikitjangku tjukaruruni nganana kulira
 palunya purunypa tjukarurulpai nyinanytjaku.

¹¹ Ka panya Godalu nganananya tjukarurunyangka
 nganana pukularinytja wiya kulira tjituru-tjitururipai.

* 12:6 Proverbs 3:11-12

Palu utila kulinma panya Godalu nganananya tjukaruruni palya mulapa nyinanytjaku, kala palulanguru nganana nintiringkula pukulpa nyinapai tjukarururingkula.

¹² Uwa, kulinmaya nyangatja munuya kunpungku tungun-tunguntu Jesunya wananma. Tjinguru nyura mara walpa-walparingkula muti tjititingkula pakuringanyi, palu paku nyanga palunya kulintja wiyanguk wantira Jesunya rawanguk tungun-tunguntu wananma. ¹³ Munuya tjukaruru titutjara nyinama kurunpa uparingkula punkantjaku-tawara, panya nyura tjukaruru nyinara kunpuringkula witulya ngaraku.

Godanya Kulira Wantinytjaku-tawara

¹⁴ Rawangkuya kulinma mirpantju wiya kalypa nyinanytjikitjangku munuyanku pulkara arkanma Godalawanu wirura tjukaruru nyinanytjikitjangku. Panya nyura tjukaruru wiya nyinarampa Mayatjanya putu nyakuku. ¹⁵ Godanya panya ngaltunytju mukulya pulka, ka nyuranku uti pulkara atunymanama Godalanguru paturingkula punkantjaku-tawara. Munuyanku ngulu nyangama anangu kutju nyuralanguru kuraringkunyitjaku-tawara, panya paluru tjinguru alatjirira nyuranya uwankara kuralku.* ¹⁶ Munuyanku atunymanama kuri walytjatjarangka ngarinytjaku-tawara panya alatji wiru wiya. Munuyanku anga-nyangamatu wati panya litjunya purunyarinytjaku-tawara panya paluru Godaku

* **12:15** Panya ukiri palya pakalpai, ka tjinguru ukiri kutjupa kutjupa tjuta unngu-unngu pakani munu panya paluru tjana pakara ukiri palya tjuta tjulkura iluntananyi, ka wiyaringanyi alatjitu. Kalanku nganana uti nyanga palu purunyarinytjaku-tawara ngulu nyangama.

watarkuringu palumpa mamangku Isaacalu palumpa kalkura pukulmankunytjaku ngaranyangka, munu panya paluru tjintu kutjupa paltjatjiratjarira ngatjinu palumpa malanyangka Jacobala alatji wangkara, “Maini uwa, kanta nyuntunya Mamalu kalkura pukulmankuku ngayunya wiyangku.” Paluru kalkuntja panya wantingu maikitjangku, ka Isaacalu Jacobanya kalkura pukulmanu litjuku arangka.* ¹⁷ Ka ngana ninti panya paluru ngulalta malaku mukuringu kalkuntja panya palumpa munu palula putu ulara pulkara ngatjiningi mamangka, piruku palunya kalkuntjaku. Palu mamangku wantingu. Ka nyuranku wanyu anga-nyangama litjunya purunyarira Godaku ara wantinytjaku-tawara.

¹⁸ Panya nyura kuwari ara kutjupangka nyinanyi arkayitjangka, ara panya irititjangka wiya. Panya iritiya Israelkunu tjuta puli panya ini Tjaniyala wirkara nyinangi, munu panyaya nyangu puli panya palula waru pulka pinpanyangka, munu mungawaluru pulkangku tjutura ngaranyangka ngangkali maru pulkangku. ¹⁹⁻²⁰ Munuya kuliningi turampata pulkara wangkatjingannyangka. Munuya Godaku wangka kulu kuliningi, panya paluru tjananya pulkara wangkangu alatji, “Puli nyangatjaya pampulwiyangku wantima. Munu kutjupangku pampunnyangka nyakulampaya palunya atura iluntanama, munu tjinguru kukangku pampunnyangka nyakulaya palunya kulu atura iluntanama.” Kaya anangu tjutangku kulira pulkara nguluringkula wangkangu, “Wiya, nyangatja wituwitu

* **12:16** Uti litjulu kalkuntja panya palunya kulinma Godalu ungkuntja. Palu paluru Godaku watarkuringu munu wantira palurunku walytjangku kutju kuliningi maingka paltjaringkunytjikitjangku. Tjukurpa nyangatja nyawa Genesis 27-ta.

pulka mulapa. Wanyu piruku ngananala wangkanytja wiyangu wantima.” ²¹ Ka Moselu kulu nyanganpa uwankara nyakula wangkangu, “Tjititinganyina pulkara nguluringkula.”

²² Uwa, puli panya palulakutu nyura kuwari ankunytja wiyatu, palu nyura wirkanu puli kutjupangka puli ini Tjayanta, panya God wankaku ngurangka, ini kutjupa Jerusalemala ngura panya ilkaritjangka. Ka ngura nyara palula panya angelpa winki mulapa pukulpa alatjitu nyinara waninyi utulu kutju. ²³ Uwa, ngura pala palula nyura wirkanu Godaku walytja kutjupa tjutangka tjunguringkunyjtikitja. Panya nyara palunya tjananya Godalu ngurkantara ini tjuta walkatjunu ngura panya ilkaritjangka titutjara nyinanytjaku. Uwa, nyura pitjangu God Ngurkantankupailakutu panya paluru anangu uwankara tjukarurungku ngurkantara tjaralku. Ka ngura nyara palula miri tjuta kurunpa nyinanyi panya tjana mantangka Godalawanu tjukaruru nyinangi munuya ilungu, ka Godalu tjananya wiru mulapa palyanu. ²⁴ Uwa, nyura pitjangu Jesulakutu panya paluru nganampa ngalkilarira ara kuwaritja palyanu paluru milkali tjutira. Panya paluru nganananya palumpa milkalingka paltjinu Godanya nganampa kalyparingkunyjtaku. Uwa, Jesuku milkalingku wiru mulapa palyanu, Abelku milkalingku purunytju wiya.*

²⁵ Ka palulanguru nyura uti tungunpungkuwiyangu kulinma Godalu wangkanyangka. Panya iriti paluru mantangka Israelkunu tjutangka wangkangi,

* **12:24** Panya Kaintu Abelnga iluntankunyangka palumpa milkalingku mantangka tjutira mirara wangkangi ngapartji iluntankunyjtaku. Palu Jesuku milkalingku tjutira wangkangi Godanya nganampa kalyparingkunyjtaku.

kaya tungunpungkula palunya kulira wantingi, ka nyanga palunya tjananya Godalu pikantanangi, kaya putu kumpiningi wankakitja. Ka panya Godalu nganana ilkaringuru wangkanyangka uti nganana wanganarangku kulinma. Panya ilkaringuru wangkanyangka nganana kulira wantirampa, ka paluru mulapa nganananya pulkara pikantankuku, kala putu alatjtu kumpilku palulanguru. ²⁶ Panya iriti puli nyara Tjaniyala Godalu manta uritjinganu wangkangku wangkara. Palu kuwari nyanga paluru kalkunu alatji wangkara, “Ngayuluna kutju-aralta piruku manta ilkari kulu uritjingalku.” ²⁷ Kala nyanga palulangurulta kulini, “Mulapa Godalu kutjupa kutjupa uwankara paluru paluntja uritjingara wiyalku. Ka panya putu uritjingalpai tjuta titutjara ngaraku wiyaringkunytja wiya panya paluru kalkuntja munu palumpa ngura kulu ngaraku titutjara.”

²⁸⁻²⁹ Ka kutjupangku Godanya putu uritjingara wiyalku munu palumpa walytja tjuta kulu putu wiyalku. Panya Godalu ngura nganmanytju palyara wantingu nganampa palula titutjara nyinanytjaku. Palulanguru nganana uti Godaku pulkara pukularima, munula palunya tjukarurungku walkura pulkanmanama palumpa nguluringkula, panya paluru pulka mulapa munu waru pulka purunytju kura uwankara kampara wiyalpai.

13

Nyanga Alatjija Nyinama Godanya Pukularinytjaku

¹ Uti nyura Jesuku walytja nyinarampa nyuranku rawa pulkara mukuringama watarkurinytja wiya.
² Munu nyura uti anangu ngura kutjupitja pitjanyangka nyakula papulankunytja wiyangku mantjira nyurampa ngurangka pukultu kanyinma. Panya iriti anangu

kutjupangu anangu-palku angelpa mantjira kanyiningi palumpa ngurangka.* Ka nyura uti palu purunytjutu malikitja mantjira pukultu kanyinma nyurampa ngurangka.

³ Munu nyura uti tjailangka nyinapai tjuta kulu watarkuriwiyangu kulinma munu tjanampa ngalturingkula tjarpara tjananya alpamilanma.* Munuya Jesuku walytja kutjupa tjuta kulu kulinma panya anangu mirpantju tjutangu tjananya kuraꝛni. Pulkaraya tjanampa ngalturingama munuya tjananya alpamilanma.

⁴ Munu nyura uti kuritjarangu tjukarurungku kulinma munu palyanyku nyinama, munuya kuri altira wirura kanyinma. Uti nyura kuri walytjanga kutju ngarima walytjatjarangka ngarinytja wiya. Panya Godalu kura nyanga palu purunypa palyannyangka nyakula ngurkantara wiyalku. Panya paluru anangu kampangkaꝛtu ngaripai uwankaraku pukularipai wiya munu tjananya ngurkantara wiyalku.

⁵ Munuya maniku pulkara mukuringkuwiyangu wantima. Palu panya nyura kanyintjitjakuya pukularima, munuya piruku waintara mantjintjikitjangku kulintja wiyangu wantima. Panya Godalu wangkangu alatji, “Ngayuluꝛna nyuranya wantikatinytja wiya nyurala tjungu titutjara nyinaku.

Munuꝛna nyuranya watarkurinytja wiyangu titutjarangu kanyilku.” *

* 13:2 Nyawa Genesis chapter 18-ta, panya Aipuramalu anangu-palku angelpa mankurpa pukultu mantjira tjunangi palumpa ngurangka. * 13:3 Panya iritiya tjailangka nyinangi mai wiya, kutjupa kutjupa wiya, tjituꝛu-tjituꝛu pulka,

pikatjara pungkunyitja pungkunyitja. Kaya walytja tjutangu kutju mukuringkula tjarpara alpamilanangi.

* 13:5 Deuteronomy 31:6

Nyara palulanguru Godalu nyuranya rawangku kanyin-nyangkaya maniku pulkara mukuringkunyta wiyangku wantima. ⁶ Munu alatji wangkama kurunpa raparingkula, “Mayatjalu ngayunya atunymara kanyilpai
kana ngulu wiya nyinanyi,

Kani ngayunya anangungku putu kurani.” *

⁷ Kaya kulinma wanyu tjana panya nyuranya atunymara kanyilpai tjuta, panya tjanaya nyurala tjakultjunu Godaku tjukurpa. Uwa, ara tjanampa kulinma panya tjana mantangka nyinaralpi Jesunya tungun-tunguntu wananingi munu panyaya rapa alatjitu ilungu. Ka nyura nyangatja kulira uti tjananya arkanma munuya Jesunya titutjarangku wananna tjana purunytju. ⁸ Panya Jesunya Christanya kutjupariwiya kuwari palurutu alatjitu nyinanyi. Panya paluru iriti mulapa nyinangi, munu kuwari palurutu nyinanyi, munu palurutu titutjara nyinaku wiyaringkunyta wiya alatjitu.

⁹ Palu kutjupa tjutangku nyurala tjukurpa kutjupa kutjupa tjuta ngunti wangkara nintinnyangkaya kulira wantima ngunti iwara kutjupangka katinytjaku-tawara. Panya nganana kurunpa kunpuringkupai Godalu nganannya ngaltunytjungku rapannyangka kutju. Palu nganana kuka mai kutjupatjara ngalkula kutjupatjara wantira putu kurunpa raparingkupai. Panya kutjupa tjutangkuya ara nyanga palunya tjananya wananingi munuya kurunpa kunpuringkunyta wiya alatjitu.

¹⁰ Kaya tiinta milmita war^{kar}ipai tjuta putu ngananala tjunguringkupai Godanya walkuntjikitja. Panya nganana Jesuku mulamularingkula kutju Godanya rapangku walkulpai, panya Jesunya nganampa ilura milkali tjutingu. Kala palulanguru kuka katira

* 13:6 Psalm 118:6

ungkunytja wiyangku palumpa mulamularingkula palunya walkulpai. ¹¹ Panya kuli kutjupa kuli kutjupa wati tjukurtjara pulkangku kukaku milkalingka para-kurpilpai ngura milmilpa mulapa panya tiinta unngutja Godalu nyakula angangu uwankara kura tjuta palyantjitjanguru kalypangu pungkuwiyangku wantinytjaku. Palu iltjanpaya urilta katira ngurangka patu nguwanpa kutjalpai kampara mulururira tjunparingkunytjaku. ¹² Ka panyaya palu purunypa Jesunya urilta katira ngurangka patu nguwanpa iluntanu. Palu paluru nganampa anga-ilungu nganananya palumpa milkalingka paltjintjikitja nganana Godala mirangka palya mulapa nyinanytjaku.

¹³ Uwa, Jesunya nganampa pikatjararingu ngurangka urilta patu, kala uti palu purunypa ara nganmanyitja tjuta wantikatira Jesula tjunguringkula nyinama, kalanya tjana palyalta palunya nganananya ananma. ¹⁴ Panya mantangka ngura wiru ngaranytja wiya nganana palula tjungu wanka titutjara nyinanytjaku. Palu nganana panya ngura kutjupaku patara ala-ala nyinanyi, munula ngura nyara palula Godala tjungu titutjara nyinaku.

¹⁵⁻¹⁶ Palulangurula uti Jesulawanungku Godanya rawangku walkunma puntu winkingku, panya Jesunya alatjitu nganampa ilungu. Ka nyura uti watarkurinytja wiyangku palyanyku nyinara angangu kutjupa tjuta kulu alpamilanma intjanungku ungkula. Panya alatjingannyangka Godanya pulkara pukularipai.

¹⁷ Ka nyura uti wangananrangku kulinma angangu panya nyuranya atunymara kanyilpai tjutangka. Panya paluru tjana nyuranya rawangku atunymananyi nyura Jesunya tjukarurungku wanantjaku. Panya Godalu tjananya ungu warka nyanga palunya, munu tjananya nyan-ganyi nyuranya wirura kanyintjaku. Ka nyura tjanala wangananrangku kulinma tungunpungkuwiyangku, ka

tjana nyuranya pukultu wirura kanyilku. Palu tjinguru nyura tungunpungkunyangka tjana tjituru-tjitururira nyuranya putu wirura kanyilku.

¹⁸ Palu wanyuya rawangku nganampa Godala tjap-inma. Panya nganaṅa palumpa warḱa tjakarurungku palyaṅi kunṅa wiyangku, munula nganaṅa titutjara mukuringanyi tjakaruru palyanyku nyinanytjikitja. ¹⁹ Ka ngayulu nyuranya pulḱara ngatjini nyura ngayuku Godala tjapintjaku paluru ngayunya nyuralakutu kuwari nguwanpa malakungku iyantjaku.

Tjanampa Godala Tjapintja

²⁰⁻²¹ Uwa, Mama Godalu anṅangu tjuṅa palumpa kalypa nyinanytjaku palyalpai. Munu paluru Mayatja Jesunya pakaltjingaṅu ilunytjitjanguru. Panya paluru tjapata pulḱangku nganaṅanya tjiipi purunypa atunymara kanyilpai. Munu paluru alatjitu walytja puntu winki intjanuringu munu ilura milkali tjutingu nganampa uwankaraku. Ka nyara palulanguru Godalu Jesunya pakaltjingaṅu milkali tjutinytjitjanguru, ka ara panya Godalu nganṅmanytju kalkuntjitjalta utiringu, munu titutjara ngaraku wiyaringkunyitja wiya. Kaṅa nyurampa tjapini nyanga alatji,

“Mama God, nyanga tjananya nintinma wiru tjuṅa palyantjaku, panya nyuntu mukuringkunyitja uwankara wanganarangku kulira palyantjaku. Ka Mayatja Jesu, nyuntu tjananya kunpunma tjakaruru nyinara Godanya kutju pukulmankunyitjaku.”

Alatjina nyurampa tjapilpai. Kala wanyu uwankarangku Jesunya Christanya titutjarangku mirawaṅnima! Uwa, mulapa.

Tjukurpa Malatja

²² Walytja tjuta, tjukurpa nyanga ngayulu nyurampa walkatjunkunytjaya purkarangku palyanyku kulinma. Panya ngayulu alatji walkatjunu nyuranya rapantjikit-jangu tjukurpa mutumutu.

²³ Ka nganampa panya malpa Timitjinya tjailanguru pakanu, ka nyura kulinu? Ka tjinguru paluru ngayula nyangangka warpungkula wirkara tjunguringkunyangka ngali kutjaratu ma-pitjaku nyuranya nyakunytjikitja.

²⁴ Palu nyura tjakultjura anangu panya nyuranya atunyumara kanyilpai tjutangka munu Godaku walytja kutjupa uwankarangka kulu, panya nganana tjananya kulini tjanampa pukularira. Ka panya Italinya ngurara tjutangku kulu palu purunyupatu nyuranya kulini.

²⁵ Uwa, alatjituna wangkanyi. Ka Godalu nyuranya pukultjungku wirura kanyinma.

Tjukurpa Palya
Portions of the Holy Bible in the Pitjantjatjara language of
Australia

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not sell this work for a profit.

 You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 19 Oct 2021 from source files dated 22 Nov 2019

b29b7786-0954-5b75-82cb-3657182b63d6